



水經注釋

卷二之卷四



水經注釋卷二

仁和趙一清誠夫錄

河水二

河水一清按凡經文次篇之首有某水二字皆後人所加蓋漢人作經自為一篇豈能逆料酈氏為之注而先于每卷交割之處增二字以別之哉或酈注既成用二字為提掇則可耳然非經之舊也此卷首列河水二字謂重源之再見也又南入葱嶺山其義例如此

河水重源有三非惟二也一源西出身毒之國

禹貢錐指曰身

毒當作捐毒漢書捐毒國王治衍敦谷東至都護治所八百六十一里至踈勒南與葱嶺屬無人民西上葱嶺則休循也西北至大宛千三百里北與烏孫接先儒以為即身毒非也張騫曰身毒國在大夏東南可數千里有蜀物去蜀不遠大夏即大月氏所居之地也今捐毒在大月氏之東北西去休循二百餘里豈身毒乎酈注

蓋承其誤葱嶺之上西去休循二百餘里皆故塞種也南屬

葱嶺高千里西河舊事曰葱嶺在敦煌西八千里其山

高大上生葱故曰葱嶺也河源潛發其嶺分為二水一

水西逕休循國南在葱嶺西郭義恭廣志曰休循國居

葱嶺其山多大葱又逕難兜國北北接休循西南去罽

賓國三百四十里河水又西逕罽賓國北月氏之破塞

王南君罽賓治循鮮城土地平和無所不有金銀珍寶

異畜奇物踰于中夏大國也山嶮有大頭痛小頭痛之

山赤土身熱之阪人畜同然河水又西逕月氏國南治

監氏城其俗與安息同匈奴冒頓單于破月氏殺其王

以頭為飲器國遂分遠過大宛西居大夏為大月氏其

餘小眾不能去者共保南山羌中號小月氏故有大月

氏小月氏之名也又西逕安息國南城臨媯水地方數

千里最大國也有商賈車船行旁國畫革旁行為書記

也河水與蜺羅跂禰水同注雷翥海釋氏西域記曰蜺

羅跂禰出阿耨達山西句之北全氏曰之北猶言如北逕于闐國

漢書西域傳曰于闐以西水皆西流注于西海又西逕

四大塔北釋法顯所謂糺尸羅國漢言截頭也佛為菩

薩時以頭施人故因名國國東有投身餒餓虎處皆起

塔又西逕犍陀衛國北是阿育王子法益所治邑佛為

菩薩時亦於此國以眼施人其處亦起大塔又有弗樓沙國天帝釋變爲牧牛小兒聚土爲佛塔法王因而成大塔所謂四大塔也法顯傳曰國有佛鉢月氏王大興兵衆來伐此國欲持鉢去置鉢象上象不能進更作四輪車載鉢八象共牽復不進王知鉢緣未至於是起塔畱鉢供養鉢容二斗雜色而黑多四際分明厚可二分甚光澤貧人以少華投中便滿富人以多華供養正復百千萬斛終亦不滿佛圖調曰佛鉢青玉也受三斗許彼國寶之供養時願終日香花不滿則如言願一把滿則亦便如言又按道人竺法維所說佛鉢在大月支國

起浮圖高三十丈七層鉢處第二層金絡絡鑲縣鉢鉢是青石或云縣鉢虛空須菩提置鉢在金机上佛一足跡與鉢共在一處國王臣民悉持梵香七寶璧玉供養塔跡佛牙袈裟頂相舍利悉在弗樓沙國釋氏西域記曰犍陀越王城西北有鉢吐羅越城佛袈裟王城也東有寺重復尋川水西北十里有河步羅龍淵佛到淵上浣衣處浣石尙存其水至安息注雷翥海又曰犍陀越西西海中有安息國竺芝扶南記曰安息國去私訶條國二萬里國土臨海上卽漢書天竺安息國也戶近百萬最大國也漢書西域傳又云犁靽條支臨西海長老

傳聞條支有弱水西王母亦未嘗見自條支乘水西行可百餘日近日所入也或河水所通西海矣故涼土異物志曰葱嶺之水分流東西西入大海東為河源禹紀所云崑崙者焉張騫使大宛而窮河源謂極於此而不達於崑崙者也河水自葱嶺分源東逕伽舍羅國釋氏西域記曰有國名伽舍羅逝此國狹小而總萬國之要道無不由城南有水東北流出羅逝西山山即葱嶺也逕岐沙谷出谷分為二水一水東流逕無雷國北治盧城其俗與西夜子合同又東流逕依耐國北去無雷五百四十里俗同子合又東流逕蒲犁國北治蒲犁谷北

去疎勒五百五十里俗與子合同河水又東逕皮山國

北治皮山城西北去莎車三百八十里禹貢錐指曰按自尉賓至陀衛

皆西流注西海之水水經乃拙手所作提挈不清賴有鄭注為之發明人始知有葱嶺之河東西分流不然則似河水自葱嶺西行至陀衛而復東行以入葱嶺大惑不解矣一清按水經世傳脫誤兼之經注混淆此篇尤甚一為改正眼界豁然覺東樵之言猶為唐突前人也

其一源出于闐國南山北流與葱嶺河合東注蒲昌海

河水又東與于闐河合南源道于闐南山俗謂之仇摩

置自置北流逕于闐國西治西城土多玉石西去皮山

三百八十里東去陽關五千餘里釋法顯自烏夷西南

行路中無人民沙行艱難所逕之苦人理莫比在道一

月五日得達于闐其國殷庶民篤信多大乘學威儀齊整器鉢無聲城南一十五里有利刹寺中有石鞞石上有足跡彼俗言是辟支佛跡法顯所不傳疑非佛跡也又西北流注于河卽經所謂北注葱嶺河也南河又東逕于闐國北釋氏西域記曰河水東流三千里至于闐屈東北流者也漢書西域傳曰于闐已東水皆東流南河又東北逕扞彌國北治扞彌城西去于闐三百九十里南河又東逕精絕國北西去扞彌四百六十里南河又東逕且末國北又東右會阿耨達大水釋氏西域記曰阿耨達山西北有大水北流注牢蘭海者也其水北

流逕且末南山又北逕且末城西國治且末城西通精絕二千里東去鄯善七百二十里種五穀其俗略與漢同又曰且末河東北流逕且末北又流而左會南河會流東逝通爲注賓河注賓河又東逕鄯善國北治伊循城故樓蘭之地也樓蘭王不恭於漢元鳳四年霍光遣平樂監傅介子刺殺之更立後王漢又立其前王質子尉屠耆爲王更名其國爲鄯善百官祖道橫門王自請天子曰身在漢久恐爲前王子所害國有伊循城土地肥美願遣將屯田積粟令得依威重遂置田以鎮撫之敦煌索勤字彥義有才略刺史毛奕表行貳師將軍全氏

曰貳師之官後漢所無且其時刺史秩卑將酒泉敦煌
 不得表行將軍也何氏曰其事無可考
 兵千人至樓蘭屯田起白屋召鄯善焉者龜茲三國兵
 各千橫斷注賓河河斷之日水奮勢激波凌冒隄勦厲
 聲曰王尊建節河隄不溢王霸精誠呼沱不流水德神
 明古今一也勦躬禱祀水猶未減乃列陣被杖鼓譟謹
 叫且刺且射大戰三日水乃迴減灌浸沃衍胡人稱神
 大田三年積粟百萬威服外國其水東注澤澤在樓蘭
 國北扞泥城其俗謂之東故城去陽關千六百里西北
 去烏壘千七百八十五里至墨山國千八百六十五里
 西北去車師千八百九十里土地沙鹵少田仰穀焉國

國出玉多葭葦檉柳胡桐白草國在東垂當白龍堆乏
 水草常主發導負水擔糧迎送漢使一清按此處有脫文故彼俗

謂是海為牢蘭海也釋氏西域記曰南河自于闐於東
 北三千里至鄯善入牢蘭海者也北河自岐沙東分南
 河即釋氏西域記所謂二支北流逕屈茨隗夷禪善入
 牢蘭海者也北河又東北流分為二水枝流出焉北河
 自疎勒逕流南河之北釋氏西域記曰葱嶺以東南北
 有山相距千餘里東西六千里河出其中暨于溫宿之
 南左合枝水上承北河于疎勒之東西北流逕疎勒國
 南又東北與疎勒北山水合水出北谿東南流逕疎勒

城下漢書西域傳曰南去莎車五百六十里有市列西
 當大月氏大宛康居道釋氏西域記曰國有佛浴牀赤
 真檀木作之方四尺王于宮中供養漢永平十八年耿
 恭以戊己校尉為匈奴左鹿蠡王所逼恭以此城側澗
 傍水自金蒲遷居此城匈奴又來攻之壅絕澗水恭于
 城中穿井深一十五丈不得水吏士渴乏笮馬糞汁飲
 之恭乃仰天嘆曰昔貳師拔佩刀刺山飛泉湧出今漢
 德神明豈有窮哉整衣服向井再拜為吏士禱之有頃
 水泉奔出眾稱萬歲乃揚水以示之虜以為神遂即引
 去後車師叛與匈奴攻恭食盡窮困乃煮鎧弩食其筋

革恭與士卒同生死咸無二心圍恭不能下關寵上書
 求救建初元年明帝一清按建初是章帝年號酈氏誤
 書求救時肅宗新即位記也後漢書耿恭傳云初關寵上
 則明帝字為誤無疑納司徒鮑昱之言遣兵救之至

柳中以校尉關寵分兵入高昌壁攻交河城車師降遣
 恭軍吏范羌將兵二千人迎恭遇大雪丈餘僅能至城
 中夜聞兵馬大恐羌遙呼曰我范羌也城中皆稱萬歲
 開門相持涕泣尚有二十六人衣履穿決形容枯槁相
 依而還北河又東逕莎車國南治莎車城西南去蒲犁
 七百四十里漢武帝開西域屯田于此有鐵山出青玉
 北河又東逕溫宿國南治溫宿城土地物類與鄯善同

北至烏孫赤谷六百一十里東通姑墨二百七十里于此枝河右入北河北河又東逕姑墨國南入姑墨川水注之水導姑墨西北赤沙山東南流逕姑墨國西治南

城南至于闐馬行十五日土出銅鐵及雌黃其水又東

南流右注北波河

一清按北波河謂北循河也章懷後漢書注曰波傍也音波又西域傳作

波義反史記曰波山通道

又東逕龜茲國南又東左合

龜茲川水有二源西源出北大山南釋氏西域記曰屈

茨北二百里山夜則火光晝日但煙人取此山石炭

冶此山鐵恒充三十六國用故郭義恭廣志曰龜茲能

鑄冶其水南流逕赤沙山釋氏西域記曰國北四十里

山上有寺名雀離大清淨又出山東南流枝水左派焉

又東南水流三分右二水俱東南流注北河又東川水

逕龜茲東北歷赤沙積黎南流枝水右出西南入龜茲

城

全氏曰四音屈茨也字注中注

故延城矣西去姑墨六百七十

里川水又東南流逕于輪臺之東也昔漢武帝初通西

域置校尉屯田于此搜粟都尉桑宏羊奏言故輪臺以

東地廣饒水草可溉田五千頃以上其處溫和田美可

益通溝渠種五穀收穫與中國同時匈奴弱不敢近西

域於是徙莎車相去千餘里即是臺也其水又東南流

右會西川枝水水有二源俱受西川東流逕龜茲城南

合爲一水水閒有故城蓋屯校所守也其水東南注東川水東川水又東南逕烏壘國南治烏壘城西去龜茲三百五十里東去玉門陽關二千七百三十八里與渠犁田官相近土地肥饒於西域爲中故都護治焉漢使持節鄭吉并護北道故號都護都護之起自吉置也其水又東南注大河大河又東右會敦薨之水其水出焉耆之北敦薨之山在匈奴之西烏孫之東山海經曰敦薨之水出焉而西流注于泐澤出于崑崙之東北隅實惟河源者也二源俱導西源東流分爲二水西南流出於焉耆之西經流焉耆之野屈而東南流注於敦薨之

渚右水東南流又分爲二左右焉耆之國城居四水之中在河水之洲治員渠城西去烏壘四百里南會兩水同注敦薨之浦東源東南流分爲二水但澗瀾雙引洪湍濬發俱東南流逕出焉耆之東導于危須國西國治危須城西去焉耆百里又東南流注于敦薨之藪川流所積潭水斯漲溢流爲海史記曰焉耆近海多魚鳥東北隔大山與車師接敦薨之水自西海逕尉犁國國治尉犁城西去都護治所三百里北去焉耆百里其水又西出沙山鐵關谷又西南流逕連城引注裂以爲田桑宏羊曰臣愚以爲連城以西可遣屯田以威西國卽此

處也其水又屈而南逕渠犁國西故史記曰西有大河
 卽斯水也又東南流逕渠犁國治渠犁城西北去烏壘
 三百三十里漢武帝通西域屯渠犁卽此處也南與精
 絕接東北與尉犁接又南流注于河山海經曰敦薨之
 水西流注于泐澤蓋亂河流自西南注也河水又東逕
 墨山國南治墨山城西至尉犁二百四十里一清按漢書西域傳
 作山國云鄯善國西北去都護治所千七百八十五里
 至山國千三百六十五里師古曰此國山居故名山國
 也又云山國去長安七千一百七十里東南與鄯善且
 未接師古曰常在山下居不爲城治也漢書脫去墨字
 師古遽以臆解之更不識所居何山所治何城觀河水
 酈注甚是分明可補史傳之缺文正小顏之曲說

又東逕注賓城南又東逕樓蘭城南而東注蓋撥田士

所屯故城禪國名耳河水又東注于泐澤卽經所謂蒲
 昌海也水積鄯善之東北龍城之西南龍城故姜賴之
 虛胡之大國也蒲昌海溢盪覆其國城基尙存而至大
 晨發西門暮達東門澮其崖岸餘溜風吹稍成龍形西
 面向海因名龍城地廣千里皆爲鹽而剛堅也行人所
 逕畜產皆布羶臥之掘發其下有天鹽方如巨枕以次
 相累類霧起雲浮寡見星日少禽多鬼怪西接鄯善東
 連三沙爲海之北隘矣故蒲昌亦有鹽澤之稱也山海
 經曰不周之山北望諸毗之山臨彼岳崇之山東望泐
 澤河水之所潛也其源渾渾泡泡者也東去玉門陽關

一千三百里

全氏曰按郭璞注去玉門陽關三百餘里與漢書西域傳合也

廣袤三百

里其水澄渟冬夏不減其中洞湍雷轉為隱淪之脈當

其還流之上飛禽奮翮於霄中者無不墜於淵波矣即

河水之所潛而出於積石也

又東入塞過敦煌酒泉張掖郡南

河自蒲昌有隱淪之證竝閒關入塞之始自此經當求

實致也河水重源又發于西塞之外出于積石之山山

海經曰積石之山其下有石門河水冒以西南流是山

也萬物無不有焉禹貢所謂導河自積石也山在西羌

之中燒當所居也延熹二年西羌燒當犯塞護羌校尉

段熲討之追出塞至積石山斬首而還司馬彪曰西羌

者自析支以西濱于河首左右居也河水屈而東北流

逕於析支之地是為河曲矣應劭曰禹貢析支屬雍州

在河關之西東去河關千餘里羌人所居謂之河曲羌

也東北逕歷敦煌酒泉張掖南

一清按漢書地理志敦煌郡下有蒲昌海冥

安縣南籍端水出南羌中西北入其澤溉民田應劭曰

冥水出北入其澤龍勒縣氏置水出南羌中東北入澤

溉民田效穀縣師古曰本魚澤障也桑欽說孝武元封

六年濟南崔不意為魚澤尉教力田以勤效穀因立為

縣名淵泉縣師古曰闕駟曰地多泉水故以為名廣至

縣宜禾都尉治昆侖障酒泉郡應劭曰其水若酒故曰

也今西河朔方言謂沸溢為湑涓張掖郡饒得縣千金渠西至樂涓入澤中羌谷水出羌中東北至居延入海過郡二行二千一百里刪丹縣桑欽以為導弱水自此西至酒泉合黎居延縣居延澤在東北古文以為流沙都尉治此即應劭地理風俗記曰敦煌一清按漢志敦三郡之水也應劭地理風俗記曰敦煌劭曰敦大也煌盛也與酒泉張掖俱是仲瑗之說則此不應獨遺之劉昭郡國志補註敦煌郡下引耆舊記曰國當乾位地列良虛水有懸泉之神山有鳴沙酒泉其之異川無蛇虺澤無兕虎華戎所交一都會也

水甘若酒味故也張掖言張國臂掖以威羌狄說文曰郡制天子地方千里分為百縣縣有四郡故春秋傳曰上大夫縣下大夫郡至秦始皇置三十六郡以監縣矣從邑君聲釋名曰郡羣也人所羣聚也黃義仲十三州記曰郡之言君也改公侯之封而言君者至尊也郡守專

權君臣之禮彌崇今郡字君在其左邑在其右君為元首邑以載民故取名於君謂之郡漢官曰秦用李斯議分天下為三十六郡凡郡或以列國陳魯齊吳是也或以舊邑長沙丹楊是也或以山陵太山山陽是也或以川原西河河東是也或以所出金城城下得金酒泉泉味如酒豫章樟樹生庭雁門雁之所育是也或以號令禹合諸侯大計東治之山會計國名會稽是也全氏曰元文大計東治之山因名會稽是注所引有舛譌又東治之名更在會稽之後蓋自區冶死始有之仲瑗反以為古地名亦誤也

河逕其南而纏絡遠矣河水又東自河曲逕西海郡南漢平帝時王莽秉政欲耀威德以服遠方諷羌獻

西海之地置西海郡而築五縣焉周海亭燧相望莽篡政紛亂郡亦棄廢全氏曰按五縣謂修遠監羌與武罕莽奪其地攻走虜順礫也據莽傳居攝二年西羌怨西海太守程永河水又東逕允川而歷大榆小榆谷北

羌迷唐鍾存所居也永元五年貫友代聶尙為護羌校

尉攻迷唐斬獲八百餘級收其熟麥數萬斛於逢畱河

上築城以盛麥且作大船於河峽作橋渡兵迷唐遂遠

依河曲永元九年迷唐復與鍾存東寇而還十年謁者

王信耿譚西擊迷唐降之詔聽還大小榆谷迷唐種人

一清按此處似多種人二字後漢書西羌傳云和帝令迷唐將其種人還大小榆谷迷唐以為漢作河橋兵來無常故地不可復居辭以飢餓不能遠出遂復背叛云云則背叛者止迷唐耳故下有與羌為讐種人與官兵

擊之之文擊之者擊迷唐也豈有種人背叛種人復擊之之事乎其云與羌為讐據後漢書云迷唐復還賜支河曲初累姐種附漢迷唐怨之遂擊殺其酋豪由是與諸種為讐酈注刪落不存故難曉耳以漢造

河橋兵來無時故地不可居復叛居河曲與羌為讐種

人與官兵擊之允川去迷唐數十里營止遣輕兵挑戰

因引還迷唐追之至營因戰迷唐敗走於是西海及大

小榆谷無復聚落隃麋相曹鳳上言建武以來西戎數

犯法常從燒當種起所以然者以其居大小榆谷土地

肥美又近塞內與諸種相傍南得鍾存以廣其眾北阻

大河因以為固又有西海魚鹽之利緣山濱河以廣田

畜故能彊大常雄諸種今黨援沮壞親屬離叛其餘勝

兵不過數百宜及此時建復西海郡縣規固二榆廣設屯田隔塞羌胡交關之路殖穀富邊省轉輸之役上拜鳳為金城西部都尉遂開田二十七部列屯夾河與建威相首尾後羌反遂罷按段國沙州記吐谷渾於河上作橋謂之河厲長一百五十步兩岸壘石作基陞節節相次大木從橫更鎮壓兩邊往來相去三丈竝大材以板橫次之施鉤欄甚嚴飾橋在清水川東也

又東過隴西河關縣北

全氏曰施廷樞曰水經全用後漢地名不然河關故屬金城郡也上

曲陽之稱中山亦其證因河關之屬隴西而知水經為東京之作義最精審子嘗謂山經亦成于後漢故其稱河關亦曰隴西也洮水從東南來流注之全氏曰道元歷敘河關一帶大河所會之水而以洮

水終之舊本錯誤以注為經于是胡渭疑洮水不應再見反改河關下之經文洮水為澆水以避之不知河關一帶之水通名洮河非別有所謂澆水也胡氏畢生治水經乃有此繆

河水又逕沙州北段國曰澆河西南一百七十里黃

沙沙南北一百二十里東西七十里西極大楊川望黃

沙猶若人委干糝于地都不生草木蕩然黃沙周迴數

百里沙州於是取號焉地理志曰漢宣帝神爵二年置

河關縣

齊氏召南曰今本漢志是文在破羌縣下豈誤移于河關與抑俱有而一存一脫與全氏曰按

道元注于破羌縣亦有此語而所引是應劭說則知此是班固河關之本注而應劭又再注之于破羌今本漢書于河關下失去元注于破羌下復脫應劭曰三字猶幸是文有可考爾蓋取河之關塞也

風俗通曰百里曰同總名為縣縣元也首也從系倒首

與縣易偏矣言當元靜平徭役也釋名又曰縣縣也縣於郡矣黃義仲十三州記曰縣弦也弦以貞直言下體之居鄰民之位不輕其誓施繩用法不曲如弦聲近縣故以取名今縣字在半也一清按此句疑有誤漢高帝六年令

天下縣邑城張晏曰令各自築其城也河水又東北流入西平郡界左合二川南流入河又東北濟川水注之水西南出濫瀆東北流入大谷謂之大谷水北逕澆河城西南北流注于河河水又東逕澆河故城北有二城東西角倚東北去西平二百二十里宋少帝景平中拜吐谷渾阿豺一清按通鑑宋紀作阿柴為安西將軍澆河公即此城

也河水又東北逕黃川城河水又東逕石城南左合北谷水昔段熲擊羌於石城投河墜坑而死者八百餘人

即於此也河水又東北逕黃河城南西北去西平二百

一十七里河水又東北逕廣違城北全氏曰先司空公曰廣違即廣威音

同字異字文蓋取此城以名縣又合烏頭川水水發遠川引納支津北

逕城東而北流注于河河水又東逕邯川城南城之左

右歷谷有二水一清按後漢書馬武傳章懷注曰此水分流謂之東西邯也導自北

山南逕邯亭注于河河水又東臨津谿水注之水自南

山北逕臨津城西而北流注于河河水又東逕臨津城

北白土城南十三州志曰左南津西六十里有白土城

城在大河之北而為緣河濟渡之處

全氏曰按胡三省曰漢左南津之白

土城晉置白土縣屬金城郡其漢上郡之白土縣乃後魏新平郡之白土縣不可溷也

魏涼州刺

史郭淮

何氏曰據三國志淮領雍州非涼州刺史蓋史傳之略

破羌遮塞于白土

即此處矣河水又東左會白土川水水出白土城西北

下東南流逕白土城北又東南注于河河水又東北會

兩川右合二水參差夾岸連襄負嶮相望河北有層山

山甚靈秀山峯之上立石數百丈亭亭桀豎競勢爭高

遠望參參若攢圖之託霄上其下層巖峭舉壁岸無階

縣巖之中多石室焉室中若有積卷矣而世士罕有津

逮

何氏曰歸太僕家鈔本作津造

者因謂之積書巖巖堂之內每時見

神人往還矣蓋鴻衣羽裳之士鍊精餌食之夫耳俗人

不悟其仙者乃謂之神鬼彼羌目鬼曰唐述復因名之

為唐述山指其堂密之居謂之唐述窟其懷道宗元之

士皮冠淨髮之徒亦往棲託焉故秦州記曰河峽崖傍

有二窟一曰唐述窟高四十丈西二里有時亮窟高百

丈廣二十丈深三十丈藏古書五笥亮南安人也

地理今釋

積石山在今河州北一百二十里水經注謂之唐述山

其西五十里有積石關唐置積石軍于此山海經云積

石山在金城河關縣西南境中杜佑通典云禹施功自

積石而東今西平郡龍支縣界山是也按諸家言積石

者多以此為小積石別有大積石去此尚千餘里其說

輿地廣記云班固所載張騫窮河源事乃意度之非實見蒲昌海與積石通流其言甚正蓋河源在吐蕃境漢時吐蕃未通中國武帝以于闐山出玉案古圖書乃名河所出為崑崙後人遂并積石亦失其實耳至水經并云積石在葱嶺之北則又失之遠矣或譏杜佑主龍支郡國志隴西郡河關縣積石山在西南又桓帝紀燒當羌叛段熲追擊于積石注即禹導河積石在鄯州龍支縣南是河州積石之名非始于唐矣一清按此言積石主通典與禹貢雖指異雖指主水經注不以杜佑之言為然

下封有水導自是山谿水南注河謂之唐述水河水又東逕野亭南又東北流歷研川謂之研川水又東北注于河謂之野城口河水又東歷鳳林北鳳林山名也五巒俱峙者彥云昔有鳳鳥飛遊五峯故山有斯目矣秦州記曰枹罕原北名鳳林川川中則黃河東流也

河水又東與灘水合水導源塞外羌中故地理志曰其水出西塞外東北流歷野虜中逕消銅城西又東逕河列城東考地說無目蓋出自戎方矣左合列水水出西北谿東北流逕列城北又東入灘水城居二水之會也灘水又北逕可石孤城西西戎之名也又東北右合黑城谿水水出西北谿下東南流逕黑城南又東南支水左出焉又東南入灘水又東北逕榆城東榆城谿水注之水出素和細越西北山下東南流逕于細越川夷俗鄉名也又東南出狄周峽東南右合黑城谿之枝津津水上承谿水東北逕黑城東北注之榆谿又東南逕

榆城南東北注灘水灘水又東北逕石門口山高嶮絕對岸若門故峽得厥名矣疑即臯蘭山門也漢武帝元狩三年驃騎霍去病出隴西至臯蘭謂是山之關塞也應劭漢書音義曰臯蘭在隴西白石縣塞外河名也孟康曰山關名也今是山去河不遠故論者疑目河山之間矣灘水又東北臯蘭山水自山左右翼注灘水灘水又東白石川水注之水出縣西北山下東南流枝津東注焉白石川水又南逕白石城西而注灘水灘水又東逕白石縣故城南王莽更曰順礫關駟曰白石縣在狄道西北二百八十五里灘水逕其北今灘水東南注之

而不出其北也灘水又東逕白石山北應劭曰白石山在東羅谿水注之水出西南山下東入灘水灘水又東左合罕开南谿水出罕开西東南流逕罕开南十三州志曰廣大坂在枹罕西北罕开在焉一清按此句有脫字顧氏祖禹方輿紀要云罕开谷在河州西水經注白石縣東有罕开渡又東則枹罕故城也蓋誤以溪為渡昔慕容吐谷渾自燕歷陰山西馳而創居於此灘水又東逕枹罕縣故城南應劭曰枹罕羌侯邑也十三州志曰枹罕

縣在郡西二百一十里

一清按漢志枹罕縣屬金城郡續志屬隴西郡

灘水在

城南門前東過也灘水又東北故城川水注之水有二源南源出西南山下東北流逕金紐北嶺北又東北逕

一故城南又東北與北水會北源自西南逕故城北右
 入南水亂流東北注灑水灑水又東北左合白石川之
 枝津水上承白石川東逕白石城北又東絕罕开谿又
 東逕枹罕城南又東入灑水灑水又東北出峽北流注
 于河地理志曰灑水出白石縣西塞外東至枹罕入河
 河水又逕左南城南十三州志曰石城西一百四十里
 有左南城者也津亦取名焉大河又東逕赤岸北即河
 夾岸也秦州記曰枹罕有河夾岸岸廣四十丈義熙中
 乞佛於此河上作飛橋橋高五十丈三年乃就河水又
 東洮水注之地理志曰水出塞外羌中

一清按漢志隴西郡臨洮縣洮

水出西羌中

沙州記曰洮水與墊江水俱出強臺山山南即

墊江源山東則洮水源山海經曰白水出蜀郭景純注

云從臨洮之西傾山東南流入漢而至墊江故段國以

為墊江水也洮水同出一山故知強臺西傾之異名也

洮水東北流逕吐谷渾中吐谷渾者始自東燕慕容之

枝庶因氏其字以為首類之種號也故謂之野虜自洮

強南北三百里中地草徧是龍鬚而無樵柴洮水又東

北流逕洮陽會城北沙州記曰強城東北三百里有會

城城臨洮水者也建初二年羌攻南部都尉于臨洮上

遣行車騎將軍馬防與長水校尉耿恭救之諸羌退聚

洮陽卽此城也洮水又東逕共和山南城在四山中洮

水又東逕迷和城北羌名也

一清按魏志鄧艾傳景元三年破姜維于侯和通鑑

齊武帝紀魏主召吐谷渾王伏連籌入朝伏連籌辭疾不至輒修臨洮泥和二城置戍兵守焉胡三省曰泥和

卽水經注所謂迷和城洮水逕其南又逕洮陽城東宋白曰洮州臨洮郡城本名泥陽在洮水之北乃吐谷渾

所築南臨洮水極險峻今謂之洪和城共又東逕甘枳

和卽洪和也侯和卽泥和亦卽迷和耳

亭歷望曲在臨洮西南去龍桑城二百里洮水又東逕

臨洮縣故城北禹治洪水西至洮水之上見長人受黑

玉書於斯水上洮水又東北流屈而逕索西城西建初

二年馬防耿蒸從五谿祥檻

朱氏謀璋箋曰一作檻檻

谷出索西與

羌戰破之築索西城徙隴西南部都尉居之亦曰赤水

城亦曰臨洮東城也沙州記曰從東洮至西洮一百二

十里者也洮水又屈而北逕龍桑城西而西北流馬防

以建初二年從安故五谿出龍桑開通舊路者也俗名

龍城

一清按龍桑城六朝史亦作桑城通鑑因之蓋省文也不然酈以爲俗名龍城豈又有桑城一名乎

洮水又西北逕步和亭東步和川水注之水出西山

下東北流出山逕步和亭北東北注洮水洮水又北出門

峽歷東歷川葦塏川水注之水出桑嵐西谿東流歷桑

嵐川又東逕葦塏川北東入洮水洮水又北歷峽逕偏

橋出夷始梁右合葦塏川水東南石底橫下北歷葦塏

川西北注洮水洮水又東北逕龍桑城東又北會藍川

水水源出東歷川西北谿南流

一清按此處有脫字

歷川東北流

逕藍川歷水城北

一清按魏書地形志洪和郡藍川縣真君八年置

東入洮水

洮水又北逕外羌城西又北逕和博城東城在山內左

合和博川川水出城西南山下東北逕和博城南東北

注于洮水洮水北逕安故縣故城西地理志曰隴西之

屬縣也十三州志曰縣在郡南四十七里蓋延轉擊狄

道安故五谿反羌大破之即此也洮水又北逕降狄道

故城西關駟曰今日武始也洮水在城西北下又北隴

水注之即山海經所謂濫水也水出鳥鼠山西北高城

嶺西逕隴底其山崖崩落者聲聞數百里故揚雄稱響

若坻頽是也又西北歷白石山下地理志曰降狄道東

有白石山

一清按狄道稱降渭水篇隴縣亦稱降樂史太平寰宇記云蘭州狄道縣漢書地理志屬

隴西郡惠帝時改為武始郡以狄道為降狄道則

是晉時改稱道元引班志稱降斯其繆耳 濫水又

西北逕武階城南又西北逕降狄道故城東百官表曰

縣有蠻夷謂之道有公主謂之邑

全氏曰按本表曰列侯所食縣曰國皇太

后皇后公主所食曰邑有蠻夷曰道今鈔變割截不可曉 應劭曰反舌左衽不與華

同須有譯言乃通也漢隴西郡治秦昭王二十八年置

應劭曰有隴坻在其東故曰隴西也神仙傳曰封君達

隴西人服鍊水銀年百歲視之如年三十許騎青牛故

號青牛道士王莽更郡縣之名郡曰厭戎縣曰操虜也

昔馬援為隴西太守六年為狄道開渠引水種秔稻而郡中樂業即此水也濫水又西北流注于洮水洮水右

合二水左會大夏川水水出西山二源合舍而亂流逕

金柳城南

全氏曰金柳亦金紐之轉音魏書地形志大夏縣有金柳城

十三州志曰

大夏縣西有故金柳城去縣四十里本都尉治又東北

逕大夏縣故城南地理志曰王莽之順夏晉書地道記

曰縣有禹廟禹所出也又東北出山注于洮水洮水又

北翼帶三水亂流北入河地理志曰洮水北至枹罕東

入河是也

又東過金城允吾縣北

金城郡治也漢昭帝始元六年置王莽之西海也莽又

更允吾為修遠縣河水逕其南不在其北西有湟水出

塞外東逕西王母石室石釜西海鹽池北故闕駟曰其

西即湟水之源也地理志曰湟水所出也

一清按漢志金城郡臨羌

縣西北至塞外有西王母石室僊海鹽池北則湟水所出東至允吾入河西有須抵池善長所引似有割截之誤且先引注文而後言臨羌亦未合又僊海疑當作僊海僊字相近致訛湟水又東南流

逕龍夷城故西零之地也十三州志曰城在臨羌新縣

西三百一十里王莽納西零之獻以為西海郡治此城

湟水又東南逕卑禾羌海北有鹽池闕駟曰縣西有卑

禾羌海者也

一清按漢志臨羌縣下注引闕駟曰西世有卑和羌即獻王莽地為西海郡者也

謂之青海東去西平二百五十里

一清按太平寰宇記甘肅張掖縣下云甘

峻山一名紺峻山水經注云張水歷紺峻山南與張掖

河合即鮮水也今本無之方輿紀要云西海亦曰儂海

酈道元曰古西儂之地也亦曰青海亦曰卑禾羌海亦

曰鮮水海亦曰允吾谷鹽池西海則其總名也在張掖

境謂之張掖水**湟水東流逕湟中城北**故小月氏之地也十三

州志曰西平張掖之間大月氏之別小月氏之國范曄

後漢書曰湟中月氏胡者其王為匈奴所殺餘種分散

西踰葱嶺其弱者南入山從羌居止故受小月氏之名

也後漢西羌傳曰羌無弋爰劍者秦厲公時以奴隸亡

入三河羌怪為神推以為豪河湟之間多禽獸以射獵

為事遂見敬信依者甚眾

沈氏炳異曰道元引此文不甚了然爰劍以被焚不死故

羌神之又以教民田畜故羌敬信之不應節去其曾孫忍因雷湟中為湟中羌

也**湟水又東右控四水導源四谿東北流注于湟湟水**

又東逕赤城北而東入逕戎峽口右合羌水水出西南

山下逕護羌城東故護羌校尉治又東北逕臨羌城西

東北流注于湟湟水又東逕臨羌縣故城北漢武帝元

狩元年以封孫都為侯國

沈氏曰據史漢表乃封臨蔡非臨羌是元封非元狩全氏

曰臨蔡漢表云屬河內當是鄉亭之名也王莽之監羌也謂之綏戎城非也

湟水又東盧谿水注之水出西南盧川東北流注于湟

水湟水又東逕臨羌新縣故城南關駟曰臨羌新縣在

郡西百八十里湟水逕城南也城有東西門西北隅有

子城湟水又東右合湟谿伏湟石杜蠡四川東北流注
 之左會臨羌谿水水發新縣西北東南流歷縣北東南
 入湟水湟水又東龍駒川水注之水右出西南山下東
 北流逕龍駒城北流注于湟水湟水又東長寧川水注
 之水出松山東南流逕晉昌城晉昌川水注之長寧水
 又東南養女川水注之水發養女北山有二源皆長湍
 遠發南總一川逕養女山謂之養女川一清按太平御覽云彼羌多禱
而祈闕駟曰長寧亭北有養女嶺即浩壘之西西平之
 北山也亂流出峽南逕長寧亭東城有東西門東北隅
 有金城去西平西北四十里十三州志日六十里遠矣

長寧水又東南與一水合水出西山東南流水南山上
 有風伯祠春秋祭之其水東南逕長寧亭南東入長寧
 水長寧水又東南流注于湟水湟水又東牛心川水注
 之水出西南遠山東北流逕牛心堆東又北逕西平亭
 西東北入湟水湟水又逕西平城北東城即故亭也漢

景帝六年封隴西太守北地公孫渾邪為侯國沈氏曰據史漢

表俱作平曲其子賀傳亦作平曲乃東海之屬縣全氏
 日索隱日漢表在高城則是渤海非東海也今本無之
 蓋脫失也寰宇記日在霸州永清縣漢志東海有二平
 曲縣齊召南日縣邑同名者皆異郡故或加東西字以
 別之東海一郡而平曲二縣同名殊不可曉以莽所改
 一曰平端一曰端平推之或者第二平曲是曲平乎道
 元以為西平蓋誤以曲為西耳一清按後漢書萬修傳
 永初七年鄧太后紹封修會孫豐為曲平亭侯則以第

二平曲為曲平非無證也魏黃初中立西平郡憑倚故亭增築南西

北三城以為郡治湟水又東逕土樓南樓北倚山原峯

高三百尺有若削成樓下有神祠彫牆故壁存焉闕駟

曰西平亭北有土樓神祠者也今在亭東北五里右則

五泉注之泉發西平亭北雁次相綴東北流至土樓南

北入湟水湟水又東右合葱谷水水有四源各出一谿

亂流注于湟水又東逕東亭北東出漆峽山峽也東流

右則漆谷常谿注之左則甘夷川水入焉湟水又東安

夷川水注之水發遠山西北逕控衆川北屈逕安夷城

西北東入湟水湟水又東逕安夷縣故城城有東西門

去西平亭東七十里闕駟曰四十里湟水又東左合宜

春水水出東北宜春谿西南流至于安夷南入湟水湟

水又東勒且谿水注之水出縣東南勒且谿北流逕安

夷城東而北入湟水湟水有勒且之名疑即此號也闕

駟曰金城河初與浩疊河合又與勒且河合者也湟水

又東左合承流谷水南入右會達扶東西二谿水參差

北注亂流東出六谷山也東流期頓雞谷二水北流注

之又東吐那孤長門兩川南流入湟水湟水又東逕樂

都城南一清按後漢書馬武傳又戰于洛都谷章懷注

州湟水縣洛都即樂都也東流右合來谷乞斤流二水左會陽非流

谿細谷三水東逕破羌縣故城南應劭曰漢宣帝神爵
 二年置城省南門十三州志曰湟水河在南門前東過
 六谷水自南破羌川自北左右翼注湟水又東南逕小
 晉興城北故都尉治關駟曰允吾縣西四十里有小晉
 興城也湟水又東與閣門河合即浩疊河也水出西塞
 外東入塞逕敦煌酒泉張掖南東南逕西平之鮮谷塞
 尉故城南又東南與湛水合水有二源西水出白嶺下
 東源發于白岸谷合為一川東南流至霧山注閣門河
 閣門河又東逕養女北山東南左合南流川水出北山
 南流入于閣門河河又東逕浩疊縣故城南王莽改曰

典武矣關駟曰浩讀閣也故亦曰閣門水兩兼其稱矣

又東流注于湟水故地理志曰浩疊水東至允吾入湟

水一清按師古曰浩音誥水名也疊者水流峽山岸深若門也今俗呼此水為閣門河蓋疾言之耳又

東逕允吾縣北為鄭伯津與澗水合水出令居縣西北

塞外南流逕其縣故城西漢武帝元鼎二年置王莽之

罕虜也又南逕永登亭西歷黑石谷南流注鄭伯津湟

水又東逕允街縣故城南漢宣帝神爵二年置王莽之

脩遠亭也一清按漢志無亭字然莽改允吾縣為脩遠則此宜有亭字以別于郡治今漢書有脫文

當以水經注補之縣有龍泉出允街谷泉眼之中水文成交龍

或試撓破之尋平成龍畜生將飲者皆畏避而走謂之

龍泉下入湟水湟水又東逕枝陽縣逆水注之水出允
 吾縣之參街谷東南流逕街亭城南又東南逕陽非亭
 北又東南逕廣武城西故廣武都尉治郭淮破羌治無
 戴于此處也城之西南二十許里水西有馬蹏谷漢武
 帝聞大宛有天馬遣李廣利伐之始得此馬有角為奇
 故漢武帝天馬之歌曰天馬來兮歷無草逕千里兮巡
 東道胡馬感北風之思遂頓羈絕絆驤首而馳晨發京
 城食時至敦煌北塞外長鳴而去因名其處曰候馬亭
 今晉昌郡南及廣武馬蹏谷盤石上馬跡若踐泥中有
 自然之形故其俗號曰天馬徑夷人在邊效刻足有大

小之迹體狀不同視之便別逆水又東逕枝陽縣故城

南東南入于湟水地理志曰逆水出允吾參街谷東至

枝陽入湟一清按漢志謂之鳥亭逆水湟水又東流注于金城河即

積石之黃河也闕駟曰河至金城縣謂之金城河隨地

為名也釋氏西域記曰牢蘭海東伏流龍沙堆在屯皇

一清按屯皇即敦煌師古曰敦音屯漢志曰敦煌郡有白龍沙堆東南四百里阿步干

一清按通鑑晉紀魏冀州刺史阿薄干胡三省註魏書官氏內入諸姓阿伏干氏後為阿氏薄伏皆與步音通

轉而人又取山鮮卑山一清按三字注中注東流至金城為大河

出崑崙崑崙即阿耨達山也河水又東逕石城南謂之

石城津闕駟曰在金城西北矣河水又東南逕金城縣

故城北應劭曰初築城得金故曰金城也漢書集註薛瓚云金者取其堅固也故墨子有金城湯池之言矣王莽之金屏也世本曰鯀作城風俗通曰城盛也從土成聲管子曰內之為城外之為郭郭外之土開池高則溝之命之曰金城十三州志曰大河在金城北門東流有梁泉注之泉出縣之南山按耆舊言梁暉字始娥漢大將軍梁冀後冀誅入羌後其祖父為羌所推為渠帥而居此城土荒民亂暉將移居枹罕出頓此山為羣羌圍迫無水暉以所執榆鞭豎地以青羊祈山神泉湧出榆木成林其水自縣北流注于河也

又東過榆中縣北

昔蒙恬為秦北逐戎人開榆中之地按地理志曰金城郡之屬縣也故徐廣史記音義曰榆中在金城即阮嗣宗勸進文所謂榆中以南者也一清按任氏廣書敘指南曰水經河州地名曰榆城太平寰宇記河州枹罕縣榆城溪烏頭川在郡東方輿紀要蘭州有榆中城漢縣杜佑以為即故大小榆谷誤也

又東過天水北界

菀川水出勇士縣之子城南山東北流歷此成川世謂之子城川又北逕牧師菀故漢牧菀之地也羌豪迷吾等萬餘人到襄武首陽平襄勇士至此抄菀馬焚燒亭

驛卽此處也又曰菀川水地爲龍馬之沃土故馬援請與田戶中分以自給也有東西二菀城相去七里西城卽乞佛所都也又北入于河也

又東北過武威媼圍縣東

河水逕其界東北流縣西南有泉源東逕其縣南又東

北入河也

全氏曰按胡三省曰禿髮儁檀之拒赫連其臣焦朗勸令從溫圍水北渡疑因媼圍縣得名媼爲溫也前此晉馬隆討涼州鮮卑渡溫水則省文也後此拓跋伐沮渠李順謂自溫圍水至姑臧則又謂泉源逕縣南入河者

又東北過天水勇士縣北

地理志曰滿福也屬國都尉治一清按漢志勇士縣下云屬國都尉治滿福似

別是一城道元顛王莽更名之曰紀德水出縣山全氏曰此

倒引之有舛誤也句有脫文當云有水出縣西後漢書西羌傳趙冲復追羌到建威鷓陰河章懷注曰續漢志建威作武威鷓陰縣名屬安定後漢屬武威宋白曰世謂之二十八渡水卽水經河水東北過勇士縣處也

東北流谿澗縈曲途出其中逕二十八渡行者勤於溯

涉故因名焉北逕其縣而下注河又有赤畦川水南出

赤蒿谷北流逕赤畦川又北逕牛官川又北逕義城西

北北流歷三城川而北流注于河也

又東北過安定北界麥田山

河水東北流逕安定祖厲縣故城西北漢武帝元鼎五年幸雍遂踰隴登空同西臨祖厲河而還卽于此也王

莽更名之曰鄉禮也李斐曰音賴一清按五字注中注全氏曰漢書注李斐云祖厲音嗟賴祖字从衣不又東北祖厲川水注之水从示从示者作阻聲是也

出祖厲南山北流逕祖厲縣而西北流注于河河水又東北逕麥田城西又北與麥田泉水合水出城西北西南流注于河河水又東北逕麥田山西谷山在安定西北六百四十里河水又東北逕于黑城北又東北高平川水注之即苦水也水出高平大隴山苦水谷建武八年世祖征隗囂從高平第一苦水谷入即是谷也東北流逕高平縣故城東漢武帝元鼎三年置安定郡治也王莽更名其縣曰鋪睦西十里有獨阜阜上有故臺臺

側有風伯壇故世俗呼此阜為風堆其水又北龍泉水注之水出縣東北七里龍泉東北流注高平川川水北出秦長城城在縣北一十五里又西北流逕東西二太婁故城門北合一水水有五源咸出隴山西東水發源縣西南二十六里湫淵淵在四山中一清按漢志安定郡朝那縣有湫淵祠說文云安定朝那有湫泉劉昭補注續志云朝那那有湫淵方四十里停不流冬夏不增減不生草木湫

水北流西北出長城北與次水會水出縣西南四十里長城西山中北流逕魏行宮故殿東又北次水注之水出縣西南四十里山中北流逕行宮故殿西又北合次水水出縣西南四十八里東北流又與次水合水出縣

西南六十里酸陽山東北流左會右水總為一川東逕西太婁北東注苦水段頗為護羌校尉於安定高平苦水討先零斬首八千級於是水之上苦水又北與石門水合水有五源東水導源高平縣西八十里西北流次水注之水出縣西百二十里如州泉東北流右入東水亂流左會三川參差相得東北同為一川混濤歷峽峽即隴山之北垂也謂之石門口水曰石門水在縣西北八十餘里石門之水又東北注高平川水又北自延水注之西出自延谿東流歷峽謂之自延口在縣西北一百里又東北逕延城南東入高平川水又北逕廉

城東按地理志曰北地有廉城縣一清按漢志北地郡廉縣不云廉城縣亦

見下關駟言在富平北自昔匈奴侵漢新秦之士率為

狄場故城舊壁盡從胡目地理淪移不可復識當是世

人誤證也川水又北苦水注之水發縣東北百里山流

注高平川水又北逕三水縣西肥水注之水出高平

縣西北二百里牽條山西一清按方輿紀要平涼縣有牽屯山名見北史爾朱天光

及賀拔岳傳亦即地理志之開頭山師古曰開音苦見反又音牽土俗語訛謂之汧屯山杜佑曰笄頭山譌為牽屯山此名牽條蓋異名也東北流與若勃谿合水有二源總歸一

瀆東北流入肥肥水又東北流違泉水注焉泉流所發導於若勃谿東東北流入肥肥水又東北出峽注於高

平川水東有山山東有三水縣故城本屬國都尉治王莽之廣延亭也西南去安定郡三百四十里議郎張奐為安定屬國都尉治此羌有獻金馬者奐召主簿張邴入于羌前以酒醑地曰使馬如羊不以入廩使金如粟不以入懷盡還不受威化大行縣東有溫泉溫泉東有鹽池故地理志曰縣有鹽官今於城之東北有故城城北有三泉疑即縣之鹽官也高平川水又北入于河河水又東北逕朐卷縣故城西地理志曰河水別出為河溝東至富平北入河河水於此有上河之名也

水經注釋卷二終

水經注釋卷三

仁和趙一清誠夫錄

河水三

河水又北過北地富平縣西

河側有兩山相對水出其間即上河峽也世謂之為青

山峽河水歷峽北注枝分東出

一清按太平寰宇記慶州樂蟠縣馬嶺山俗名

箭筈嶺與青山相連互有馬嶺坂左右帶川相傳漢之牧地也有水出縣西北注水經云與青山水合今本無之樂蟠縣漢北地郡富平縣地章懷後漢書注云青山在北地參絲界青山中水所出也續志北地郡參絲縣故屬安定有青山馬嶺水亦見補附洛水河水又北逕富平縣故城西秦置北部都尉治縣城

一清按漢志北地郡富平縣北部都尉治神泉障云治在障則非縣城矣

道元王莽名郡為威戎縣曰持武建武中曹鳳字仲理
 誤也為北地太守政化尤異黃龍應于九里谷高岡亭角長
 三尺大十圍稍至十餘丈天子嘉之賜帛百匹加秩中
 二千石河水又北逕薄骨律鎮城城在河渚上赫連果
 城也桑果餘林仍列州上但語出戎方不究城名訪諸
 耆舊咸言故老宿彥云赫連之世有駿馬死此取馬色
 以為邑號故曰城為白口駟韻轉之謬遂仍今稱所未
 詳也一清按漢志北地郡靈洲縣有河奇苑號非苑師
 古曰苑謂馬牧也水中有可居者曰洲此地在此河
 之洲隨水高下未嘗淪沒故號靈洲又曰河奇也二苑
 皆在北焉方輿紀要漢靈洲縣其後赫連夏據其地後
 魏主燾滅之太延二年置薄骨律鎮在河渚上孝昌中
 改置靈洲初在河北後于果園所築城為州治駿馬之

稱或因漢舊牧苑而得名也寰宇記薄骨律渠在迴樂
 縣南六十里溉田一千餘頃迴樂縣即漢富平縣地

河水又北逕朔方郡宏靜鎮典農城東一清按太平寰
 宇記引此注作

宏靜縣非也隋圖經云宏靜縣本漢城居河外三里乃
 舊傳薄骨律鎮倉城也後魏立宏靜鎮徙關東漢人以
 充屯田則縣是周世謂之胡城又北逕上河城東世謂
 隋之際所置也

之漢城薛瓚曰上河在西河富平縣即此也馮參為上

河典農都尉所治也厄林曰漢書馮參為上河農都尉
 百官表曰農都尉武帝置後漢百

官志武帝時邊郡置農都尉主屯田殖穀建武六年邊
 郡往往置都尉注引漢官儀曰農都尉不治民御覽引

魏畧曰曹公置典農中郎將秩二千石然則漢官無典字至當塗
 百石典農校尉秩比二千石然則漢官無典字至當塗

始更耳水經及注作典農皆非梁統傳光武拜梁騰酒
 泉典農都尉蔚宗亦誤一清按續志注農都尉以下無

漢官儀一條而御覽所引魏畧之文則見于大司農之
 下作魏志也然愚竊有疑者裴世期注三國志引先賢

行狀云陶謙表陳登為典農校尉則在曹氏之先已有典農之稱矣此與厄林所引范書可參證也河水

又北逕典農城東俗名之為呂城皆參所屯以事農屯

河水又東北逕廉縣故城東王莽之西河亭地理志曰卑

移山在西北河水又北與枝津合水受大河東北逕富

平城所在分裂以溉田圃北流入河今無水爾雅曰滄

反入言河決復入者也河之有滄若漢之有潛也河水

又東北逕渾懷障西地理志曰渾懷都尉治塞外者也

一清按漢志北地郡富平縣渾懷都尉治塞外渾懷障太和初三齊平徙歷下民

居此遂有歷城之名矣南去北地三百里河水又東北

歷石崖山西去北地五百里山石之上自然有文盡若

獸馬之狀粲然成著類似圖焉故亦謂之畫石山也

又北過朔方臨戎縣西

河水東北逕三封縣故城東漢武帝元狩三年置十三

州志曰在臨戎縣西一百三十里河水又北逕臨戎縣

故城西漢元朔五年立舊朔方郡治一清按續志云凡縣名先書者即所

治也此是東漢郡治王莽之所謂推武也河水又北有枝渠東出

謂之銅口東逕沃壑縣故城南漢武帝元狩三年立王

莽之綏武也枝渠東注以溉田所謂智通在我矣河水

又北屈而為屠申澤南河出焉河水又北迤西溢於窳

渾縣故城東漢武帝元朔二年開朔方郡以縣為西部

都尉治有道自縣西北出雞鹿塞王莽更郡曰溝搜縣
 曰極武其水積而為屠申澤澤東西一百二十里故地
 理志曰屠申澤在縣東即是澤也闕駟謂之窳渾澤矣
 屈從縣北流東野
 河水又屈而東流為北河東逕高關南史記趙武靈王
 既襲胡服自代並陰山下至高關為塞山下有長城長
 城之際連山刺天其山中斷兩岸雙闕峩然雲舉望若
 闕焉即狀表目故有高關之名也自關北出荒中關口
 有城跨山結局謂之高關戍上古迄今常置重捍以防
 塞道漢元朔四年衛青將十萬人敗右賢王于高關即

此處也河水又東逕臨河縣故城北漢武帝元朔三年
 封代恭王子劉賢為侯國全氏曰代共王子皆封西河
 此或是西河之臨水縣一清
 按西河近代宜是也而史漢表俱作臨河王莽之監河也漢武帝元朔二年
 大將軍衛青絕梓嶺梁北河是也

至河目縣西

河水自臨河縣東逕陽山南漢書注曰陽山在河北指
 此山也東流逕石跡阜西是阜破石之文悉有鹿馬之
 跡故斯阜納稱焉南屈逕河目縣在北假中地名也自
 高關以東夾山帶河陽山以西皆北假也史記曰秦使
 蒙恬將十萬人北擊胡渡河取高關據陽山北假中是

也北河又南合南河上承西河東逕臨戎縣故城北又東逕臨河縣南又東逕廣牧縣故城北有東部都尉治王莽之鹽官也逕流二百許里東會於河河水又南逕馬陰山西漢書音義曰陽山在河北陰山在河南謂是山也而即實不在河南史記音義曰五原安陽縣北有馬陰山今山在縣北言陰山在河南又傳疑之非也余按南河北河及安陽縣以南悉沙阜耳無他異山故廣志曰朔方郡北移沙七所而無山以擬之是義志之僻也陰山在河東南則可矣河水又東南逕朔方縣故城東北詩所謂城彼朔方也漢元朔二年大將軍衛青取

河南地為朔方郡使校尉蘇建築朔方城即此城也王莽

以為武符者也

一清按寰宇記夏州朔方縣下引水經注曰有濛水合金河而南流初學記引

水經注云朔方郡有濛水紫河今本無之陝西行都司志曰高居誨使于闐記云甘州西五百里至肅州渡金河西百里出天關是也方輿紀要云紫河在大同府西北塞外杜佑曰勝州榆林縣有金河紫河自馬邑郡善無縣流入境合金河南流入大河魏道武帝擊劉衛辰自五原金津濟即金河之津按地理志云

金連鹽澤青鹽澤並在縣南矣又按魏土地記曰縣有

大鹽池其鹽大而青白名曰青鹽又名戎鹽入藥分漢

置典官鹽池去平城宮千二百里在新秦之中服虔曰

新秦地名在北方千里如淳曰長安以北朔方以南也

薛瓚曰秦逐匈奴收河南地徙民以實之謂之新秦也

屈南過五原西安陽縣南

河水自朔方東轉逕渠搜縣故城北地理志曰朔方有

渠搜縣中部都尉治王莽之溝搜亭一清按今本也禮漢書落亭字

三朝記曰北發渠搜南撫交阯此舉北對南禹貢之所

云析支渠搜矣禹貢雖指曰傅同叔云陸氏曰漢志朔方郡有渠搜縣武紀云北發渠搜是也

以余考之漢朔方之渠搜非此所謂渠搜此亦當是金城以西之戎也後世種落遷徙故漢有居朔方者若禹

時渠搜居朔方則不應浮積石陸說非也按水經河水自朔方東轉逕渠搜縣故城北注云禮三朝記曰北發

渠搜南撫交阯此舉北對南禹貢之所云析支渠搜矣誤始道元而陸氏因之大戴禮漢武紀並有三朝記語

渠搜與交阯對舉則不在朔方可知涼土異物志曰古渠搜國在大宛北界隋書西域傳曰發汗國都葱嶺之

西五百餘里古渠搜國也渠搜之在西域明矣河水又逕西安陽縣故城南王

莽更之曰漳安矣河水東逕田辟城南地理志曰故西部都尉治也

部都尉治也

屈東過九原縣南

河水又東逕成宜縣故城南王莽更曰艾虜也河水又

東逕原亭城南關駟十三州志曰中部都尉治一清按原亭今

本漢書作原高疑彼文為誤蓋中部治原亭西部治田辟辟與壁同城障之名二語皆孟堅自註道元不應一

引班書一引關志也似十三州志曰下別有闕語而今缺失矣河水又東逕宜梁縣之

故城南關駟曰五原西南六十里今世謂之石崖城河

水又東逕稠陽城南東部都尉治一清按漢志此語在五原郡下而稠陽縣

下反無之道元注于臨沃縣下重敘河水又東逕稠陽縣故城南一地而再見豈別是一城耶始不可曉也

又東逕河陰縣故城北又東逕九原縣故城南秦始皇
 置九原郡治此漢武帝元朔二年更名五原也王莽之
 獲降郡成平縣矣西北接對一城蓋五原縣之故城也
 王莽之填河亭也竹書紀年云魏襄王十七年邯鄲命
 吏大夫奴遷于九原又命將軍大夫適子戍吏皆貉服
 矣其城南面長河北背連山秦始皇逐匈奴並河以東
 屬之陶山築亭障為河上塞徐廣史記音義曰陶山在
 五原北即此山也一清按史記始皇紀云西北斥逐匈奴自榆中並河以東屬之陰山以為
 三十四縣城河上為塞徐廣曰陰山在五原北蒙恬傳
 云于是渡河據陽山徐廣曰五原西安陽縣北有陰山
 陰山在河南陽山在河北此陶山似是陰山之誤始皇
 紀云又使蒙恬渡河取高關陶山北假中道元以陰山

不在河南既于史記之文無碍陰陶字形相似故耳非
 別有一陶山也劉向七畧古文或誤以見為典以陶為
 陰如此全氏曰史記年起自臨洮東暨
 類多表是三十三年遼海西並陰山築長城及開南越地晝警夜作民勞怨
 苦故楊泉物理論曰秦始皇使蒙恬築長城死者相屬
 民歌曰生男慎勿舉生女哺用餽不見長城下尸骸相
 支柱其冤痛如此矣蒙恬臨死曰夫起臨洮屬遼東城
 塹萬餘里不能不絕地脈此固當死也

又東過臨沃縣南

王莽之振武也河水又東枝津出焉河水又東流石門
 水南注之水出石門山地理志曰北出石門障即此山

也西北趣光祿城

一清按漢志五原郡稠陽縣北出石門障得光祿城又西北得支龍城又

西北得頭曼城又西北得

庫河城又西北得宿虜城 甘露三年呼韓邪單于還詔

遣長樂衛尉高昌侯董忠車騎都尉韓昌等將萬六千

騎送單于居幕南保光祿徐自為所築城也故城得其

名矣城東北即懷朔鎮城也其水自障東南流逕臨沃

城東東南注於河河水又東逕稠陽縣故城南王莽之

固陰也地理志曰自縣北出石門障河水決其西南隅

又東南枝津注焉水上承大河於臨沃縣東流七十里

北漑田南流二十里注於河河水又東逕塞泉城南而

東注

又東過雲中槓陵縣南又東過沙南縣北從縣東屈南過沙陵縣西

大河東逕咸陽縣故城南王莽之賁武也河水屈而流

白渠水注之水出塞外西逕定襄武進縣故城北西部

都尉治王莽更名伐蠻世祖建武中封趙慮為侯國也

白渠水西北逕成樂固北郡國志曰成樂故屬定襄也

魏土地記曰雲中城東八十里有成樂城今雲中郡治

一名石盧城也白渠水又西逕魏雲中宮南魏土地記

曰雲中宮在雲中縣故城東四十里白渠水又西南逕

雲中縣故城南故趙地虞氏記云趙武侯自五原河曲

築長城東至陰山又于河西造大城一箱崩不就乃改
 卜陰山河曲而禱焉晝見羣鵠遊于雲中徘徊經日見
 大光在其下武侯曰此為我乎乃即于其處築城今雲
 中城是也秦始皇十三年立雲中郡縣曰遠服矣一清按漢
 志雲中郡秦置莽曰受降雲中縣莽曰遠服今注云云有缺失矣白渠水又西北逕沙
 陵縣故城南王莽之希恩縣也其水西注沙陵湖一清按漢
 志定襄郡武進縣白渠水出塞外西至沙陵入河又有荒干水出塞外南逕鍾
 山山即陰山故郎中侯應言于漢曰陰山東西千餘里
 單于之苑囿也自孝武出師攘之于漠北匈奴失陰山
 過之未嘗不哭謂此山也其水西南逕武臯縣王莽之

永武也又南逕原陽縣故城西又西南與武泉水合其
 水東出武泉縣之故城西南縣即王莽之所謂順泉者
 也水南流又西屈逕北輿縣故城南按地理志曰五原
 有南輿縣王莽之南利也故此加北舊中部都尉治十
 三州志曰廣陵有輿故此加北疑太疎遠也其水又西
 南入荒干水西南逕白道南谷口有城在右側帶長城
 背山面澤謂之白道城自城北出有高阪謂之白道嶺
 沿路惟土穴出泉挹之不窮余每讀琴操見琴慎相和
 雅歌錄云飲馬長城窟及其板陟斯途遠懷古事始知
 信矣非虛言也一清按李善文選注引酈善長水經注曰余至長城其下往往有泉窟可飲馬

古詩飲馬長城窟行信不虛也蓋

顧瞻左右山椒之上

有垣若頽基焉沿谿互嶺東西無極疑趙武靈王之所築也荒干水又西南逕雲中城北白道中谿水注之水發源武川北塞中其水南流逕武川鎮城城以景明中築以禦北狄矣其水西南流歷谷逕魏帝行宮東世謂之阿計頭殿宮城在白道嶺北阜上其城員角而不方四門列觀城內惟臺殿而已其水又西南歷中谿出山西南流於雲中城北南注荒干水荒干水西出塞外懷朔鎮東北荒中南流逕廣德殿西山下余以太和十八年從高祖北巡居于陰山之講武臺臺之東有高祖講

武碑碑文是中書郎高聰之辭也自臺西出南上山山無樹木惟童阜耳卽廣德殿所在也其殿四柱兩厦堂宇綺井圖畫奇禽異獸之象殿之西北便得焜煌堂雕楹鏤桷取狀古之溫室也其時帝幸龍荒遊鸞朔北南秦王仇池楊難當捨蕃委誠重譯拜闕陛見之所也故殿以廣德爲名魏太平真君三年刻石樹碑勒宣時事碑頌云肅清帝道振攝四荒有蠻有戎自彼氏羌無思不服重譯稽顙恂恂南秦斂斂推亡峩峩廣德奕奕焜煌侍中司徒東郡公崔浩之辭也碑陰題宣城公李孝伯尚書盧遐等從臣姓名若新鏤焉其水歷谷南出陰

山西南入荒干水荒干水又西南注沙陵湖

一清按漢志定襄郡

武臯縣荒干水出塞外西至沙陵入河

湖水西南入於河河水南入楨陵

縣西北緣胡山歷沙南縣東北兩山二縣之間南出余

以太和中為尚書郎從高祖北巡親所逕陟縣在山南

王莽之楨陸也北去雲中城一百二十里縣南六十許

里有東西大山山西枕河河水南流脈水尋經殊垂川

去之次似非關究也

又南過赤城東

全氏曰胡三省云後魏明元帝泰常八年築長城于長川之南起自赤城西至五原

延表二千餘里即此城也但考登國二年幸赤城三年又幸東赤城疑有兩赤城而今不可考矣一清按顧景范曰

赤城堡在萬全指揮司東北二百里其地相傳蚩尤所居後魏主珪登國二年幸廣甯遂如赤城神瑞二年復如赤

城此東赤城也司治即今宣化府史云幸廣甯遂如赤城其為東赤城無疑東赤城見沽水篇注河水所逕之赤城

在朔州西北

又南過定襄桐過縣西

定襄郡漢高帝六年置王莽之得降也桐過縣王莽更

名椅桐者也河水於二縣之間濟有君子之名

一清按寰宇記

雲州雲中縣下引冀州圖經曰雲中郡南有君子津即大河之津又勝州河濱縣下云本漢沙南縣地有君子

津引水經注云云今注云河水于二縣之間似指雲中之沙南定襄之桐過而言也昔漢桓帝十

三年西幸榆中東行代地洛陽大賈齋金貨隨帝後行

夜迷失道往投津長曰子封送之渡河賈人卒死津長

埋之其子尋求父喪發冢舉尸資囊一無所損其子悉

以金與之津長不受事聞于帝帝曰君子也即名其津

為君子濟濟在雲中城西南二百餘里

厄林曰後漢書桓帝再幸函谷

一臨雲夢乘輿鹵簿不屆榆中且京雒宅中代賦不為東地元號屢易紀年不得十三嘉君子之名必非蠡吾之主案魏收書以猗屯為桓帝幽并之間水草是逐度沙漠而飲馬據參合以張瓊故以榆林為西桑乾為左矣尋厥昆嗣屢遊斯津則桓即猗屯差無乖爽但猗屯統部止十一年此言十三又非佳證且桑氏已著濟名則事在漢桓之先矣一清按十三十一字畫訛誤君子濟名經注混淆方叔之言義猶未盡敢附窺虎之末以成析酈 河水又東南左合一水水出契吳東山西逕故

里南北俗謂之契吳亭其水又西流注於河河水又南

樹頽水注之

一清按史記周本紀曰吾聞犬戎樹敦韋昭曰樹立也言犬戎立性敦篤也方輿紀

要云志云周穆王時犬戎樹惇居此有城在寧夏衛西周涼州刺史史寧曰樹敦賀真二城吐谷渾之巢穴也魏書地形志朔州神武郡領殊頽縣今注云樹頽蓋語出戎方音之異耳 水出東山西南流

右合中陵川水水出中陵縣西南山下北俗謂之大浴

山其水亦取名焉東北流逕中陵縣故城東北俗謂之

北右突城王莽之遮害也十三州志曰善無縣南七十

五里有中陵縣世祖建武二十五年置

一清按班志已

置自光武也司馬彪郡國志云定襄郡中陵故屬雁門以言改隸則可耳 其水又西北右合

一水水出東山北俗謂之貸敢山水又受名焉其水自西

北流注於中陵水又西北流逕善無縣故城西王莽之

陰館也十三州志曰舊定襄郡治地理志曰雁門郡治

其水又西北流右會一水水出東山下北俗謂之吐文

水山又取名焉北流逕鉏亭南西流逕土壁亭南西出

峽左入中陵水水又北分爲二水一水東北流謂之沃
 水又東逕沃陽縣故城南北俗謂之可不塋城王莽之
 敬陽也又東北逕沃陽城東又東合可不塋水水出縣
 東南六十里山下西北流注沃水合流而東逕參合縣
 南魏因參合陁以卽名也北俗謂之倉鶴陁道出其中
 亦謂之參合口陁在縣之西北卽燕書所謂太子寶自
 河西還師參合三軍奔潰卽是處也魏立縣以隸涼城
 郡也西去沃陽縣故城二十里縣北十里有都尉城地
 理志曰沃陽縣西部都尉治者也北俗謂之阿養城其
 水又東合一水水出縣東南六十里山下北俗謂之災

豆渾水西北流注於沃水又東北流注鹽池地理志曰
 鹽澤在東北者也今鹽池西南去沃陽故城六十五里
 池水澱渟淵而不流東西三十里南北二十里池北十
 里卽涼城郡治池西有舊城俗謂之涼城也郡取名焉
 地理志曰澤有長丞此城卽長丞所治也城西三里有
 小阜阜下有泉東南流注池北俗謂之大谷堆此水亦
 受目焉中陵川水自枝津西北流右合一水於連嶺北
 水出沃陽縣東北山下北俗名之烏伏真山水曰誥升

袁河

一清按晉書匈奴右賢王去卑之子曰誥升爰魏書鐵弗劉虎南單于苗裔左賢王去卑之孫虎父

誥升爰一名訓兜誥則此河以人得名爰袁音同通用

西南流逕沃陽縣左合中

陵川亂流西南與一水合北俗謂之樹頽水水出東山下西南流右合誥升袁水亂流西南注分爲二水左水枝分南出北俗謂之太羅河右水西逕故城南北俗名之昆新城其水自城西南流注於河河水又南太羅水注之水源上承樹頽河南流西轉逕武州縣故城南清一按禹貢錐指云河水折而南逕廢東勝州東入塞其東岸則平鹵衛杜佑曰勝州東至黃河四十里北至黃河五里西北至黃河二十里平鹵衛在山西大同府西少南二百四十里本漢雁門郡之武州縣隋唐以後爲朔州地今山西朔州有武州城亦謂之河十三州志曰武套魏收地形志恒州代郡領武周縣州縣在善無城西百五十里北俗謂之太羅城水亦藉稱焉其水西南流右水注之水導故城西北五十里南

流逕城西北俗名之曰故槃迴城又南流注太羅河太羅河又西南流注於河河水又左得湍水口水出西河郡美稷縣東南流東觀記曰郭伋細侯爲并州牧前在州素有恩德老小相攜道路行部到西河美稷數百小兒各騎竹馬迎拜伋問兒曹何自遠來曰聞使君到喜故迎伋謝而發去諸兒復送郭外問使君何日還伋計日告之及還先期一日念小兒卽止野亭須期至乃往其水又東南流羌人因水以氏之漢冲帝時羌湍狐奴歸化蓋其渠帥也其水俗亦謂之爲遄波水東南流入長城東鹹水出長城西鹹谷東入湍水又東南渾波水出

西北窮谷東南流注於湍水湍水又東逕西河富昌縣故城南王莽之富成也湍水又東流謂之湍口左合一水出善無縣故城西南八十里其水西流歷於呂梁之山而為呂梁洪其山巖層岫衍澗曲崖深巨石崇竦壁立千仞河流激盪濤湧波襄雷奔電洩震天動地昔呂梁未闢河出孟門之上蓋大禹所闢以通河也司馬彪曰呂梁在離石縣西今於縣西歷山尋河竝無遏阻至是乃為河之巨嶮即呂梁矣在離石北以東可二百有餘里也

一清按閻氏若璩古文尚書疏證曰道元言呂梁之水勢與龍門無異而以為在離石離石明之石州改名永寧州者是必求其地以實之永寧州東北則今靜樂岢嵐州之地西去黃河約二百里無所謂

河流也土人欲當以河曲縣西南二十五里天橋峽亦有禹鑿之迹天將陰雨激浪如雷幾相似矣而無所謂千仞巨石又南去離石四百餘里皆與酈注不合當闕疑禹貢錐指曰呂梁即禹貢之梁山龍門之南山也尸子呂氏春秋淮南子先言龍門次言呂梁其為夏陽之梁山無疑

又南過西河囿陽縣東全氏曰漢志西河郡有囿陽囿陰二縣師古曰囿字本作囿音銀縣在囿水之陰因以為名也王莽改為方陰則是當時已誤作囿字矣今有銀州銀水之稱即是舊名猶存但字變耳然觀善長所見之本却不錯豈後人因王莽有方陰之名而妄改為囿字以實之乎

西河郡漢武帝元朔四年置王莽改曰歸新囿水出上郡白土縣囿谷東逕其縣南地理志曰囿水出西東入河王莽更曰黃土也東至長城與神御水合水出縣南神御山夾山東出至長城入於囿囿水又東逕鴻門縣

縣故鴻門亭地理風俗記曰圓陰縣西五十里有鴻門亭天封苑火井廟火從地中出圓水又東梁水注之水出縣西北梁谷東南流注圓水又東逕圓陰縣北漢惠帝五年立王莽改曰方陰矣又東桑谷水注之水出西北桑谿東北流入於圓水又東逕圓陰縣南東流注於河河水又東端水入焉水西出號山山海經曰其山木多漆椶其草多芎藭是多冷石端水出焉而東流注於河河水又南諸次之水入焉水出上郡諸次山山海經曰諸次之山諸次之水出焉是山多木無草鳥獸莫居是多象蛇其水東逕榆林塞世又謂之榆林山即漢

書所謂榆谿舊塞者也自谿西去悉榆柳之藪矣緣歷沙陵屈龜茲縣西出故謂廣長榆也王恢云樹榆為塞謂此矣蘇林以為榆中在上郡非也按始皇本紀西北逐匈奴自榆中並河以東屬之陰山然榆中在金城東五十許里陰山在朔方東以此推之不得在上郡漢書音義蘇林為是失也全氏曰按胡三省曰蘇林之說固未為盡是而道元所謂榆中在金城東五十許里亦非也衛青取河南地案榆谿舊塞正在唐麟勝二州界其西則接古上郡之境況諸次水出上郡逕榆林塞入河則榆林在上郡之東明矣諸次水無西流至金城之理夷攷其故道元特以金城郡有榆中縣遂牽合之不知其水東入長城小榆水合焉歷澗此誤尤甚于蘇林西北窮谷其源也又東合首積水水西出首積谿谿東

注諸次水又東入於河山海經曰諸次之水東流注於河即此水也河水又南湯水注之山海經曰水出上申之山上無草木而多礫石下多榛楛湯水出焉東流注於河也

又南過離石縣西奢延水注之

水西出奢延縣西南赤沙阜東北流山海經所謂生水

出孟山者也郭景純曰孟或作明

一清按八字注中注又山海經注無此文

也西山經曰又北二百二十里曰孟山郭璞曰音于黃本訛孟作孟後之讀者祇聞孟津之為盟津孟豬之為盟豬遂謂字得通用因改郭注以就之而不知其元文之不可掩也然則此八字并非酈注之舊漢破

羌將軍段熲破羌於奢延澤虜走洛川洛川在南俗因

縣土謂之奢延水又謂之朔方水矣東北流逕其縣故

城南王莽之奢節也赫連龍昇七年于是水之北黑水

之南遣將作大匠梁公叱干阿利

沈氏曰是年三月赫連改元鳳翔然後以

阿利領將作

改築大城名曰統萬城蒸土加功雉堞雖久崇

墉若新并造五兵器銳精利乃咸百鍊為龍雀大環號

曰大夏龍雀銘其背曰古之利器吳楚湛盧大夏龍雀

名冠神都可以懷遠可以柔逋如風靡草威服九區世

甚珍之又鑄銅為大鼓及飛廉翁仲銅駝龍虎皆以黃

金飾之列于宮殿之前則今夏州治也奢延水又東北

與溫泉合源西北出沙谿而東南流注奢延水奢延水

又東黑水入焉水出奢延縣黑澗東南歷沙陵注奢延水奢延水又東合交蘭水水出龜茲縣交蘭谷東南流注奢延水奢延水又東北流與鏡波水合水源出南邪山南谷東北流注於奢延水奢延水又東逕膚施縣帝原水西北出龜茲縣東南流縣因處龜茲降胡著稱又東南注奢延水又逕膚施縣南秦昭王三年置上郡治漢高祖并三秦復以為郡王莽以漢馬員為增山連率歸世祖以為上郡太守司馬彪曰增山者上郡之別名也全氏曰朱謀埠曰漢志西河自有增山縣愚謂班固不書王莽所改上郡之名是脫文意者莽即以增山名上郡故司馬彪云然今世本缺失當以水經注補之正不碍西河之別有增山縣也馬員字季主新息侯援

之兄也見後漢書本傳及章懷注東入五龍山地理志曰縣有五龍山

帝原水一清按漢志上郡膚施縣有五龍山帝原水黃帝祠四所自下亦為通稱也

歷長城東出於赤翟白翟之中一清按赤翟在中山不應在此道元注頗滑突

又有平水出西北平谿東南入奢延水又東走馬水注

之水出西南長城北陽周縣故城南橋山昔二世賜蒙

恬死于此王莽更名上陵時山上有黃帝冢故也帝崩

惟弓劍存焉故世稱黃帝仙矣其水東流昔段熲追羌

出橋門至走馬水聞羌在奢延澤即此處也門即橋山

之長城門也始皇令太子扶蘇與蒙恬築長城起自臨

洮至于碣石即是城也其水東北流入長城又東北注

奢延水又東與白羊水合其水出於西南白羊谿巡谿東北注於奢延水奢延水又東入於河山海經曰生水東流注於河河水又南陵水注之水出陵川北谿南逕其川西轉入河河水又南得離石水口水出離石北山南流逕離石縣故城西史記云秦昭王伐趙取離石者也漢武帝元朔三年封代共王子劉綰為侯國後漢西河郡治也其水又南出西轉逕隰城縣故城南漢武帝元朔三年封代共王子劉忠為侯國王莽之慈平亭也胡俗語訛尚有干城之稱其水西流注於河也

又南過中陽縣西

中陽縣故城在東東翼汾水隔越重山不濱於河也又南過土軍縣西

吐京郡治故城即土軍縣之故城也胡漢譯言皆為訛變矣其城員長而不方漢高帝十一年以封武侯宣義為侯國一清按漢表云謚式此從史表又索隱曰按位次曰信成侯也縣有龍泉出城

東南道左山下牧龍川川上多產名駒駿同滇池天馬其水西北流至其城東南土軍水出道左高山西南注之龍泉水又北屈逕其城東西北入於河河水又南合契水傍谿東入窮谷其源也又南至祿谷水口水源東窮此谿也河水又南得大蛇水發源谿首西流入河河

水又南右納辱水山海經曰辱水出於烏山其上多桑其下多楮陰多鐵陽多玉其水東流注於河俗謂之秀延水東流得浣水口傍谿西轉窮谿便即浣水之源也秀延水又東會於根水西南谿下根水所發而東北注秀延水又東南露跳水出西露谿東流又東北入秀延水亂流注於河河水又南左合信支水水發源東露谿西流入於河河水又南左會石羊水巡谿東入導源窮谷西流注於河一清按漢志西河郡穀羅縣武澤在西北武澤本曰虎澤唐人避諱改之後漢建武二十八年詔南匈奴居西河美稷之虎澤即此澤也胡三省曰虎澤應在五原曼柏之北在今榆林鎮之東北而是注無聞焉

又南過上郡高奴縣東

域谷水東啓荒原西歷長谿西南入於河河水又南合

谿口水出孔山南歷谿西流注於河孔山之上有一穴如

車輪三所東西相當相去各二丈許南北直通故謂之

孔山也山在蒲城西南三十餘里河水又右會區水山

海經西次四經之首曰陰山西北百七十里曰申山其

上多穀柞其下多柎榿其陽多金玉區水出焉而東流

注於河世謂之清水清水出上郡東流入於長城逕老

人山下又東北流至老人谷傍水北出極谿便得水源

清水又東得龍尾水口水出北地神泉障北山龍尾谿

東北流注清水又東會三湖水水出南山三湖谷東北
 流入清水清水又東逕高奴縣合豐林水地理志謂之
 涓水也故言高奴縣有涓水肥可難一清按俗本漢書落肥字水上
 有肥可接取用之博物志稱酒泉延壽縣南山出泉水
 大如筥注地為溝水有肥如肉汁取著器中始黃後黑
 如凝膏然極明與膏無異膏車及水碓缸甚佳彼方人
 謂之石漆水肥亦所在有之非止高奴縣涓水也項羽
 以封董翳為翟王居之三秦此其一也漢高祖破以縣
 之王莽之利平矣民俗語訛謂之高樓城也豐林川長
 津瀉注北流會涓涓水又南奚谷水注之水西出奚川東

南流入涓水又東注於河河水又南逕蒲川石樓山南
 逕蒲城東即重耳所奔之處也又南歷蒲子縣故城西
 今大魏之汾州治徐廣晉紀稱劉淵自離石南移蒲子
 者也闕駟曰蒲城在西北漢武帝置其水南出得黃盧
 水口東出歷蒲子城南東北入黃盧谷極谿便水之源
 也又南合紫川水水出東北紫川谷西南合江水江水
 出江谷西北入紫川水紫川水又西北入蒲水蒲水出
 石樓山下又西南入於河河水又南黑水出定陽縣西
 山二源奇發同瀉一壑東南流逕其縣北又東南流右
 合定水俗謂之白水也水西出其縣南山定水谷東逕

定陽縣故城南應劭曰縣在定水之陽也定水又東注於黑水亂流東南入於河

水經注釋卷三終

水經注釋卷四

仁和趙一清誠夫錄

河水四

河水又南過河東北屈縣西

河水南逕北屈縣故城西十里有風山上有穴如輪風氣蕭瑟習常不止當其衝飄也而略無生草蓋常不定衆風之門故也風山西四十里河南孟門山與龍門山相對山海經曰孟門之山其上多金玉其下多黃堊涅石淮南子曰龍門未闢呂梁未鑿河出孟門之上大溢逆流無有邱陵高阜滅之名曰洪水大禹疏通謂之孟

門故穆天子傳曰北升孟門九河之隘孟門卽龍門之上口也實爲河之巨阨兼孟門津之名矣此石經始禹鑿河中漱廣夾岸崇深傾崖返捍巨石臨危若墜復倚古之人有言水非石鑿而能入石信哉其中水流交衝素氣雲浮往來遙觀者常若霧露沾人窺深悸魄其水尙崩浪萬尋縣流千丈渾洪聳怒鼓若山騰濬波頽疊迄于下口方知慎子下龍門流浮竹非駟馬之道也又有燕完水注之異源合舍西流注河河水又南得鯉魚水歷澗東入窮溪首便其源也爾雅曰鱣鮪也出鞏穴三月則上渡龍門得渡爲龍矣否則點額而還非夫往

還之會何能便有茲稱乎河水又南羊求水入焉水東出羊求川西逕北屈縣故城南城卽夷吾所奔邑也王莽之朕北也汲郡古文曰翟章救鄭次于南屈應劭曰有南故加北國語曰二五言於獻公曰蒲與二屈君之疆也其水西流注于河河水又南爲采桑津春秋僖公八年晉里克敗狄于采桑是也

又南過皮氏縣西

赤水出西北罷谷川東謂之赤石川東入于河河水又南合蒲水西則兩源竝發俱導一山出西河陰山縣王莽之山寧也陰山東麓南水東北與長松水合水出西

三陽山東東北流左入蒲水蒲水又東北與北溪會同
 爲一川東北注河河水又南得丹水水出丹陽山東北
 逕冶官東俗謂之丹陽城城之左右猶有遺銅矣其水
 東北會白水口水出丹山東而西北注之丹水又東東
 北入河河水又南黑水西出丹山東而東北入于河河
 水又南至嶠谷旁全氏曰下當有合嶠谷水四字東北窮澗水源所導
 也西南流注于河河水又南洛水自獵山枝分東派東
 南注于河昔魏文侯築館洛陰指謂是水也皮氏縣王
 莽之延平也故城在龍門東南不得延逕皮氏方屆龍
 門也

又南出龍門口汾水從東來注之

昔者大禹導河積石疎決梁山謂斯處也卽經所謂龍

門矣魏土地記曰梁山北有龍門山

一清按漢志左馮翊夏陽縣禹貢梁

山在西北龍門山在北

大禹所鑿通孟津河口廣八十步巖際鑄

迹遺功尙存岸上竝有廟祠祠前有石碑三所二碑文

字紊滅不可復識一碑是太和中立竹書紀年晉昭公

元年河水赤于龍門三里梁惠成王四年河水赤于龍

門三日京房易妖占曰河水赤下民恨河水又南右合

暢谷水水自溪東南流逕夏陽縣西北東南注于河河

水又南逕梁山原東原自山東南出至河晉之望也在

馮翊夏陽縣之西臨于河上山崩壅河三日不流晉侯
 以此問伯宗卽是處也春秋穀梁傳曰成五年梁山崩
 遏河水三日不流召伯尊遇輦者不避使車右鞭之輦
 者曰所以鞭我者其取道遠矣伯尊因問之輦者曰君
 親縞素率羣臣哭之斯流矣如其言而河流河水又南
 岨谷水注之水出縣西北梁山東南流橫谿水注之水
 出三累山其山層密三成故俗以三累名山按爾雅山
 三成爲崑崙邱斯山豈亦崑崙乎山下水際有二石室
 蓋隱者之故居矣細水東流注于岨谷側谿山南有石
 室西面有兩石室北面有二石室皆因阿結牖連扇接

闕所謂石室相距也東廂石上猶傳杵臼之跡庭中亦
 有舊宇處尙髣髴前基北坎室上有微涓石溜豐周瓢
 飲似是棲遊隱學之所昔子夏教授西河疑卽此也而
 無以辨之一清按寰宇記相州安陽縣西河隋圖經云
 卜子夏田子方段干木所遊之地以魏趙多
 儒學齊魯及鄒皆謂此爲西河非龍門之西河也溪水又東南逕夏陽縣故城

北故少梁也秦惠文王十一年更從今名矣王莽之冀
 亭也其水東南流注于河昔韓信之襲魏王豹也以木
 罌自此渡河水又南右合陶渠水水出縣西北梁山東

南流逕漢陽太守殷濟精廬南俗謂之子夏廟渠水又
 南逕高門原南蓋層阜隳缺故流高門之稱矣一清按
 太平寰

宇記同州韓城縣下引水經注云高門原南有層阜秀出雲表俗謂馬門原今本無之曹氏學佺名勝志引注云層阜相承又東南逕華池南池方三百六十步在夏秀出雲表

陽城西北四里許故司馬遷碑文云高門華池在茲夏陽城西北漢陽太守殷濟精舍四里所今高門東去華

池三里渠水又東南逕夏陽縣故城南服虔曰夏陽號邑也在大陽東三十里城南朱氏謀瑋箋曰春秋僖公二年虞師晉師滅下陽杜

元凱云下陽號邑在河東大陽縣按漢志宏農陝縣注故號國在大陽東馮翊夏陽縣注故少梁龍門在北則下陽夏陽兩地也公羊傳下陽作夏陽服氏因之誤矣又歷高陽宮北又東南逕

司馬子長墓北墓前有廟廟前有碑永嘉四年漢陽太守殷濟瞻仰遺文大其功德遂建石室立碑樹桓太史

公自敘曰遷生於龍門是其墳墟所在矣渠水東南流

入河昔魏文侯與吳起浮河而下美河山之固即於此

也河水又南徐水注之水出縣西北梁山東南流逕漢

武帝登仙宮東東南流絕彊梁原逕劉仲城北是漢祖

兄劉仲之封邑也故徐廣史記音義曰郃陽國名也高

祖八年侯劉仲元年一清按史表合陽侯喜徐廣曰一名嘉則仲是其字索隱曰屬馮翊

而漢諸侯王表作郃陽王子侯表作合陽寰宇記冀州信都縣合陽城漢縣高帝時以代王喜棄國降為合陽

侯後漢省并入扶柳舊地理書並失所在蓋在今郡東界地理志平原郡有合陽縣云侯國王莽曰宜鄉者也

樂氏之記是為非矣又按名勝志引注云河水又逕劉仲城北又逕姚武壁南今本僅有劉仲城而無姚武壁

蓋有脫失矣按寰宇記同州夏陽縣有姚武壁是也其水壁姚萇僭號于此蓋以武功立因名姚武壁

東南逕子夏陵北東入河河水又南逕子夏石室東南北有二石室臨側河崖卽子夏廟室也

又南過汾陰縣西

河水東際汾陰睢縣故城在睢側漢高帝六年封周昌爲侯國魏土地記曰河東郡北八十里有汾陰城北去汾水三里城西北隅曰睢邱上有后土祠封禪書曰元鼎四年始立后土祠於汾陰睢邱是也又有萬歲宮漢宣帝神爵元年幸萬歲宮東濟大河而神魚舞水矣昔趙簡子沈欒激朱氏箋曰呂氏春秋作欒激於此曰吾好聲色而是子致之吾好士六年不進一人是長吾過而絀吾善君

子以爲能譴矣河水又逕郃陽城東周威烈王之十七年魏文侯伐秦至鄭還築汾陰郃陽卽此城也故有莘邑矣爲大姒之國詩云在郃之陽在渭之涘又曰纘女維莘長子維行謂此也城北有漢水南去二水各數里其水東逕其城內東入于河又於城南側中有漢水東南出城注于河城南又有漢水東流注于河水南猶有文母廟廟前有碑去城一十五里水卽郃水也縣取名焉故應劭曰在郃水之陽也河水又南漢水入焉水出汾陰縣南四十里西去河三里平地開源瀆泉上湧大幾如輪深則不測俗呼之爲漢魁古人壅其流以爲陂

水種稻東西二百步南北一百餘步

一清按王氏存元豐九域志河中府

古跡漢水下引水經云漢水出汾陰南四十里周迴一百八十步冬溫夏冷清澈見底今本似缺

與郃

陽漢水夾河中渚上又有一漢水皆潛相通故呂忱曰

爾雅異出同流為漢水

一清按滎河縣本漢汾陰縣地道元何以不取爾雅郭註原文

僅錄呂忱字林數語致與經典全相乖迕殆故以示博爾今疏記于左以正其失爾雅釋水漢大出尾下註云

今河東汾陰縣有水口如車輪許漬沸湧出其深無限名之曰漢馮翊郃陽縣復有漢亦如之相去數里而夾

河中階上又有一漢漢源皆潛相通在汾陰者人壅其流以為陂種稻呼其本出處為漢魁此是也尾猶底也

其水西南流歷蒲坂西西流注于河河水又南逕陶城

西舜陶河濱皇甫士安以為定陶不在此也然陶城在

蒲坂城北城即舜所都也南去歷山不遠或耕或陶所

在則可何必定陶方得為陶也舜之陶也斯或一焉孟

津有陶河之稱蓋從此始之南對蒲津關汲冢竹書紀

年魏襄王七年秦王來見于蒲坂關四月越王使公師

隅來獻乘舟始罔及舟三百箭五百萬犀角象齒焉

又南過蒲坂縣西

地理志曰縣故蒲也王莽更名蒲城應劭曰秦始皇東

巡見有長坂故加坂也孟康曰晉文公以賂秦秦人還

蒲於魏魏人喜曰蒲反矣故曰蒲反也薛瓚注漢書曰

秦世家以垣為蒲反然則本非蒲也

全氏曰孟康解因魏壽餘事而參錯

其皇甫謐曰舜所都也或言蒲坂或言平陽及漢者也

一清按舜都廣甯今直隸之懷來縣漢上谷郡之潘縣也師古曰音普拌反而胡三省通鑑註曰據水經注潘當作漢然其引皇甫士安之書則又云或言蒲阪或言潘可知宋本水經已誤潘為漢梅磧不能決擇所從徒啟後學之疑漢志續志晉志魏志皆作潘亦見灑水篇注蓋漢是夾河中階非可以建都也今城中

有舜廟魏秦州刺史治太和遷都罷州置河東郡郡多

流雜謂之徙民民有姓劉名墮者宿擅工釀採挹河流

醞成芳耐懸食同枯枝之年排於桑落之辰朱氏謀璋箋曰二語

有譎脫一清按宋李厚註東坡詩胡三省注通鑑引水經注語正同則知相沿已久故酒得其名

矣然香醕之色清白若滃漿焉別調氛氳不與佗同蘭

薰麝越自成馨逸一清按通鑑注作馨遠方土之貢選最佳酌矣

自王公庶友牽拂相招者每云索郎有顧思同旅語索

郎反語為桑落也更為籍徵之雋句中書之英談郡南

有歷山也謂之歷觀舜所耕處有舜井媯汭二水出焉

南曰媯水北曰汭水西逕歷山下上有舜廟周處風土

記曰舊說舜葬上虞又記云耕於歷山而始寧剡二縣

界上舜所耕田於山下多柞樹吳越之間名柞為櫪故

曰歷山余按周處此志為不近情傳疑則可證實非矣

安可假木異名附山殊稱彊引大舜即比寧懷全氏曰寧懷當

作甯壤寧與甯通即指舜都廣甯朱謀埠箋強引河內

之甯城于舜何與又引媯州懷戎縣之舜井以解懷字

六朝何嘗有懷戎之稱乎蓋謂以歷山更為失誌記之

尚書所謂釐降二女於媯汭也孔安國曰居媯水之內
 王肅曰媯汭虞地名皇甫謐曰納二女於媯水之汭馬
 季長曰水所出曰汭然則汭似非水名而今見有二水
 異源同歸渾流西注入于河河水又南逕雷首山西山
 臨大河北去蒲坂三十里尚書所謂壺口雷首者也俗
 亦謂之堯山山上有故城世又曰堯城闕駟曰蒲坂堯
 都按地理志曰縣有堯山首山祠雷首山在南事有似
 而非非而是千載眇邈非所詳耳又南涑水注之水出
 河北縣雷首山全氏曰此別是河北縣之涑水非聞喜
 出東山黍葭谷注以為至周陽與洮水合通鑑地理通
 釋所云在陝州夏縣北四十里者是也河北之涑水則

雷水亦即陽安澗水地理通釋所云在河中府臨晉縣
 東十二里者是也近人合而一之樂史曰涑川自聞喜
 接河今涑水篇但言涑水入張澤而不言張澤之所入
 又曰西北去蒲坂一十五里然則聞喜之涑水所入正
 與河北之涑水所出相接而又皆名涑水道元不細剖
 之兩處並引左傳伐我涑川之語已自蒙混及讀唐志
 虞鄉縣北十五里有涑水渠貞觀十七年蒲州刺史薛
 萬徹所開自聞喜引流入臨晉以溉田乃恍然曰是兩
 涑水所由合也鹽池圖說曰涑水中尾多窄至臨晉而
 小谿諸水咸注之不知涑水本至張陽而止所謂中尾
 多窄者出于人力之通也過此則又一涑水也若左傳
 之涑川則在聞喜不在蒲坂蓋王官城亦在聞喜故也
 一清按全氏之說甚辨然涑水實非有二也涑之別曰
 洮而其截為二則自金天氏始左氏傳云臺駘能業其
 官宣汾洮障大澤以處太原帝用嘉之封諸汾川則是
 張陽澤乃臺駘之遺跡故禹貢曰既修太原至于岳陽
 蓋治汾洮之水也日修者修縣之功至于岳陽而止岳
 陽霍太山之陽也其不及河可知縣且不毀臺駘之業
 至唐乃溝而通之此數千年之水道一變也又徵之杜
 元凱之言矣左傳成十三年注云涑水出河東聞喜縣

西南至蒲坂縣入河是二涑水本有相通之道杜故云然杜又在酈前惟其有道可通唐人乃得溝而合之如二涑水各異則源流判然何以稱名合一乎縣北與蒲坂分山有夷齊廟闕

駟十三州志曰山一名獨頭山夷齊所隱也山南有古

冢陵柏蔚然攢茂邱阜俗謂之夷齊墓也

閻氏若璩四書釋地曰史

記正義首陽山凡五所王伯厚攷會子書以為在蒲坂舜都者得之莫徵信于酈注然已兩說互存蓋莫能定

爾其水西南流亦曰雷水穆天子傳曰壬戌天子至于

雷首犬戎胡觴天子於雷首之阿乃獻良馬四六天子

使孔子受之于雷水之干是也昔趙盾田首山食祁彌

明翳桑之下

朱氏謀埤箋曰左傳作提彌明全氏曰祁提音近致訛然食者別是靈輒非提彌明

史記則以翳桑餓人為祁彌明斯乃善長即於此也涑有意舍左用史義門所謂故以示博者也

水又西南流注于河春秋左傳謂之涑川者也俗謂之

陽安澗水

又南至華陰潼關渭水從西來注之

汲郡竹書紀年曰晉惠公十五年

沈氏曰晉惠公以十四年卒無十五年乃

周襄王之十五年是年秦納重耳次年至河上則周襄王之十六年也涑水篇誤同秦穆公帥師

送公子重耳涉自河曲春秋左氏僖公二十四年秦伯

納之及河子犯以璧授公子曰臣負羈縻從君巡於天

下臣之罪多矣臣猶知之而況君乎請由此亡公子曰

所不與舅氏同心者有如白水投璧於此子推哭曰天

開公子子犯以為功吾不忍與同位遂逃焉河水歷船

司空與渭水會漢書地理志曰舊京兆尹之屬縣也清

按既引漢志不當云舊也左邱明國語云華嶽本一山當河河水過

而曲行河神巨靈手盪脚蹋開而為兩今掌足之迹仍

存華巖朱氏謀埠箋曰按巨靈事在薛綜西京賦注引古語云云非左氏國語也此乃誤記耳開

山圖曰有巨靈胡者偏得神元之道能造山川出河所

謂巨靈鼯首冠靈山者也常有好事之人故升華嶽

而觀厥跡焉自下廟歷列柏南行十一里東迴三里至

中祠又西南出五里至南祠謂之北君祠諸欲升山者

至此皆祈請焉從此南入谷七里又屈一祠謂之石養

父母石龕木主存焉又南出一里至天井井裁容人穴

空迂迴頓曲而上可高六丈餘山上又有微涓細水流

入井中亦不甚沾人上者皆所由涉更無別路欲出井

望空視明如在室窺窻也出井東南行二里峻坂斗上

斗下降此坂二里許又復東上百丈崖升降皆須扳繩

挽葛而行矣南上四里路到石壁緣傍稍進逕一百餘

步自此西南出六里又至一神全氏曰魏書地形志每縣下皆載有祠但直作

神字疑是北人竟以神字當祠字耳名曰胡趨寺神像有童子之容從祠

南歷夾嶺廣裁三尺餘兩箱縣崖數萬仞窺不見底祀

祠有感則雲與之平然後敢度猶須騎嶺抽身漸以就

進故世謂斯嶺為搦嶺矣度此二里便屈山頂上方七

里靈泉二所一名蒲池西流注于澗一名太上泉東注澗下上宮神廟近東北隅其中塞實雜物事難詳載自上宮東北出四百五十步有屈嶺東南望巨靈手跡唯見洪崖赤壁而已都無山下上觀之分均矣河在關內南流潼激關山因謂之潼關濩水注之水出松果之山北流逕通谷世亦謂之通谷水東北注于河述征記所謂潼谷水者也或說因水以名地也河水自潼關東北流水側有長坂謂之黃巷坂一清按一作黃巷坂傍絕澗涉此坂以升潼關所謂沂黃巷以濟潼關矣歷北出東嶠通謂之函谷關也遼岸天高空谷幽深澗道之峽車不方

軌號曰天嶮故西京賦曰巖嶮周固衿帶易守所謂秦得百二并吞諸侯也是以王元說隗囂曰請以一丸泥

東封函谷關圖王不成其弊足霸矣全氏曰按何焯曰函谷關潼關蓋一

地而異名也通典漢武帝徙函谷關于新安至獻帝西幸出關猶在新安建安十六年曹操破馬超于潼關即是中間移此所謂國之巨防不為細事而史官失之是以杜岐公亦直謂函谷關即潼關特徙其地耳然通典于新安縣下云魏明帝景初元年河南尹盧延請却函谷關于嶠下宏農守杜恕議以東徙潼關著郡下省函谷關徙關于盧氏正始元年宏農守孟康請移函谷關更號大嶠關又為金關地理志曰是年廢函谷關然則潼關置于季漢而函谷關廢于魏之正始岐公前說未經刊正而善長亦同此誤耳王元泥封之說豈指華陰之潼關乎郭緣生記曰漢末之亂魏武征韓遂馬超連兵

此地今際河之西有曹公壘道東原上云李典營義熙

十三年王師曾據此壘西征記曰沿路透迤入函道六里有舊城城周百餘步北臨大河南對高山姚氏置關以守峽宋武王入長安檀道濟王鎮惡或據山為營或平地結壘為大小七營濱帶河嶮姚氏亦保據山原陵阜之上尚傳故迹矣關之直北隔河有層阜巍然獨秀孤峙河陽世謂之風陵全氏曰史記作封陵戴延之所謂風墪者也南則河濱姚氏之營與晉對岸河水又東北玉澗水注之水南出玉溪北流逕皇天原西周固記開山東首上平博方可里餘三面壁立高千許仞漢世祭天於其上名之為皇天原上有漢武帝思子臺又北逕閿鄉城

西郡國志曰宏農湖縣有閿鄉

全氏曰按師古曰閿本從曼許密反後誤作受

而妄音汝授反今俗讀聞音則以閿與閿近致訛傳呼失其實也一清按後漢書鄭興傳云客授閿鄉章懷註云閿音聞建安中改作聞今世但有聞音而許密反之音隱矣又李宏憲云閿古文聞說文从門受聲則知閿即聞也世謂之閿鄉水也魏尚書僕射閿鄉侯河東衛伯

儒之故邑其水北流注于河河水又東逕閿鄉城南東

與全鳩澗水合水出南山北逕皇天原東述征記曰全

節地名也其西名桃原古之桃林周武王克殷休牛之

地矣西征賦曰咸徵名於桃園者也晉太康地記曰桃

林在閿鄉南谷中其水入河北注于河

又東過河北縣南

縣與湖縣分河蓼水出襄山蓼谷西南流注于河河水
 又東永樂澗水注之水北出于薄山南流逕河北縣故
 城西故魏國也晉獻公滅魏以封畢萬卜偃曰魏大名
 也萬後其昌乎後乃縣之在河之北故曰河北縣也今
 城南西二面竝去大河可二十餘里北去首山一十許
 里處河山之間土地迫隘故魏風著十畝之詩也城內
 有龍泉南流出城又南斷而不流永樂溪水又南入于
 河余按中山經卽渠豬之水也太史公封禪書稱華山
 以西名山七薄山其一焉薄山卽襄山也徐廣曰蒲坂
 縣有襄山山海經曰蒲山之首曰甘棗之山共水出焉

而西流注于河東則渠豬之水出焉而南流
 注于河如準封禪書二水無西南流河之理今診蓼水
 川流所趨與其水相扶永樂溪水導源注于河又與渠
 豬勢合蒲山統目總稱亦與襄山不殊故揚雄河東賦
 曰河靈攬踢掌華蹈襄沈氏曰原賦作兀華蹈衰蘇林曰衰山也師古曰兀古掌字
 注云襄山在潼關北十餘里以是推之知襄山在蒲坂
 蓼水卽渠豬之水也河水自河北城南東逕芮城二城
 之中有段干木冢干木晉之賢人也魏文侯過其門軾
 其廬所謂德尊萬古芳越來今矣汲冢竹書紀年曰晉
 武公元年尚一軍芮人乘京荀人董伯皆叛匪直大荔

故芮也此亦有焉

全氏曰按大荔之戎亦名芮戎在北地而芮伯之國在臨晉其後大荔滅

于秦種落蓋有居于臨晉者漢人遂合芮戎芮伯之國而一之謂臨晉即故大荔是大繆也惟善長稍辨之曰

匪直大荔故芮也此亦有焉則二紀年又云晉武公七年芮伯萬之母芮姜逐萬萬出奔魏八年周師虢師圍

魏取芮伯萬而東之九年戎人逆芮伯萬于郊斯城亦

或伯萬之故畫也河水又會槃澗水水出湖縣夸父山

北逕漢武帝思子宮歸來望思臺東又北流入于河河

水又東逕湖縣故城北昔范叔入關遇穰侯於此矣湖

水出桃林塞之夸父山廣員三百仞武王伐紂天下既

定王及嶽瀆放馬華陽散牛桃林即此處也其中多野

馬造父於此得驂騑綠耳盜驪之乘以獻周穆王使之

馭以見西王母湖水又北逕湖縣東而北流入于河魏

土地記曰宏農湖縣有軒轅黃帝登仙處黃帝採首山

之銅鑄鼎於荆山之下有龍垂胡於鼎黃帝登龍從登

者七十人遂昇於天故名其地為鼎胡荆山在馮翊首

山在蒲坂與胡縣相連晉書地道記太康記並言胡縣

也漢武帝改作湖俗云黃帝自此乘龍上天也地理志

曰京兆湖縣有周天子祠二所故曰胡不言黃帝升龍

也山海經曰西九十里曰夸父之山其木多椶枏多竹

箭其陽多玉其陰多鐵其北有林焉名曰桃林其中多

五

馬湖水出焉北流注于河故三秦記曰桃林塞在長安東四百里若有軍馬經過好行則牧華山休息林下惡行則決河漫延人馬不得過矣河水又東合柏谷水水出宏農縣南石隄山山下有石隄祠銘云魏甘露四年散騎常侍征南將軍豫州刺史領宏農太守南平公之所經建也其水北流逕其亭下晉公子重耳出亡及柏谷卜適齊楚狐偃曰不如之翟漢武帝嘗微行此亭見饋亭長妻故潘岳西征賦曰長傲賓於柏谷妻觀貌而獻餐謂此亭也柏谷水又北流入于河河水又東右合門水門水卽洛水之支流者也洛水自上洛縣東北於

拒陽城西北分爲二水枝渠東北出爲門水也門水又東北歷陽華之山卽華陽山海經所謂陽華之山門水出焉者也又東北歷峽謂之鴻關水水東有城卽關亭也水西有堡謂之鴻關堡世亦謂之劉項裂地處非也余按上洛有鴻臚園池是水津渠沿注故謂斯川爲鴻臚澗鴻關之名乃起是矣門水又東北歷邑川二水注之左水出于陽華之陽東北流逕盛牆亭西東北流與右水合右水出陽華之陰東北流逕盛牆亭東東北與左水合卽山海經所謂緝姑之水出于陽華之陰東北流注于門水者也又東北燭水注之水有二源左水南出于

衙嶺世謂之石城山其水東北流逕石城西東北合右水右水出石城山東北逕石城東東北入左水地理志曰燭水出衙嶺下谷開山圖曰衙山在函谷山西南是水亂流東注于緡姑之水二水悉得通稱矣歷澗東北出謂之開方口水側有阜名之方伯堆宋奮武將軍魯方平建武將軍薛安都等與建威將軍柳元景北入軍次方伯堆者也堆上有城卽方平所築也又東北逕邑川城南卽漢封竇門之故邑川受其名亦曰竇門城在函谷關南七里又東北田渠水注之水出衙山之白石谷東北流逕故邱亭東是薛安都軍所從城也其水又

逕鹿蹠山西山石之上有鹿蹠自然成著非人功所刊歷田渠川謂之田渠水西北流注于燭水燭水又北入門水水之左右卽函谷山也門水又北逕宏農縣故城東城卽故函谷關校尉舊治處也終軍棄繻於此燕丹孟嘗亦義動雞鳴於其下可謂深心有感志誠難奪矣昔老子西入關尹喜望氣於此也故趙至與嵇茂齊書曰李叟入秦及關而歎亦言與嵇叔夜書及關尹望氣之所異說紛綸竝未知所定矣漢武帝元鼎四年沈氏曰是三徙關於新安縣以故關爲宏農縣宏農郡治王莽更名右隊劉桓公爲郡虎相隨渡河光武聞而善之其水

側城北流而注于河河水於此有涇津之名說者咸云漢武微行柏谷遇辱寶門又感其妻深識之饋既返玉階厚賞賚焉賜以河津令其鬻渡今寶津者是也故潘岳西征賦酬匹婦其已泰胡厥夫之謬官袁豹之徒竝以爲然余按河之南畔夾側水濱有澗謂之涇津河北縣有涇水涇津其水南入于河河水故有涇津之名不從門始蓋事類名同故作者是之竹書穆天子傳曰天子自寘軫乃次于涇水之陽丁亥入于南鄭考其沿歷所鍾路直斯津以是推之知非因門矣俗或謂之偃鄉澗水也河水又合左右二水其水二源疏引俱導薄山

南流會成一川其二水之內世謂之間原言虞芮所爭之田所未詳矣又南注于河河水右會谷水水出南山北逕曹陽亭西陳涉遣周章入秦少府章邯斬之於此魏氏以爲好陽晉書地道記曰亭在宏農縣東十三里其水西北流入于河河水又東蓄水注之水出常烝之山西北逕曲沃城南又屈逕其城西西北入河諸注述者咸言曲沃在北此非也魏司徒崔浩以爲曲沃地名也余按春秋文公十三年晉侯使詹嘉守桃林之塞處此以備秦時以曲沃之官守之故曲沃之名遂爲積古之傳矣河水又東得七里澗澗在陝西七里故因名焉

谷水自南山通河亦謂之曹陽坑是以潘岳西征賦曰
 行於漫瀆之口憇於曹陽之墟袁豹崔浩亦不非其地
 矣余按漢書昔獻帝東遷逼以寇難李傕郭汜追戰于
 宏農澗天子遂露次曹陽楊奉董承外與傕和內引白
 波李樂等破傕乘輿於是得進復來戰奉等大敗兵相
 連綴四十餘里方得達陝以是推之似非曹陽然以山

海經求之菑曹字相類是或有曹陽之名也

王氏世懋讀史訂疑

日靈寶之西函谷之東有澗直下黃河曰宏農澗一統志云宋避英宗諱改為鴻蘆竊疑宋為太祖父諱宏殷耳何必并農字改之英宗初名及後更名俱不犯二字以為英宗者尤誤也後閱王得臣塵史始知其大繆不然得臣曾修陝志云靈寶之西有澗曰洪澗不知其名之因也比見水經注云縣有鴻臚圍池是水津渠浴注

故謂斯川為鴻臚澗是知洪澗語之訛也灑然始悟當時俗名是洪澗原非宏農所謂鴻臚者即得臣援證水經修志時改之耳彼自云鴻臚非鴻蘆也得臣政和時年八十所著書正當英宗前後何嘗有避諱之說乎蓋陝州古名宏農而是澗先名洪澗後名鴻臚其聲近于宏農措大強解事遂以意傅會其說以為復古而名之事故有習而非真予故拈出之以雪斯澗之誤名今靈寶人亦順呼為宏農無有知其非者仍當稱鴻臚為是不然稱洪澗猶是宋以前之語也一清按敬美之言非也據酈注鴻臚圍池在上洛縣上洛屬商州去陝四百餘里安可便以鴻臚為宏農也後漢書獻帝紀云十一月庚午李傕郭汜等追乘輿戰于東澗王師敗績壬申幸曹陽露次田中章懷注云曹陽澗名在今陝州西南七里俗謂之七里澗董卓傳云傕汜共追乘輿大戰于宏農東澗天子遂露次曹陽寰宇記陝州陝縣下云曹陽墟俗名七里澗在縣西四十五里魏武帝改曰好陽澗本日曹陽以在曹水之陽然則傕汜戰處乃是宏農之東澗一名七里澗者是今節去東字直云宏農澗方土之稱酈氏因之未為失也若以鴻臚圍池釋之抑更差違已且洪澗名見漢書注顏師古曰桃林縣南有

洪澗水即古之函關是也紛紛辨質實為辭費又全氏曰善長疑曹陽即菑陽然師古注陳涉傳云曹水出陝縣西南峴頭山北流入河今謂之好陽澗在陝縣西四十五里則菑水外別有曹水不如善長所云

水東合譙水水導源常烝之山俗謂之為干山蓋先後之異名也山在陝城南八十里其川流也二源雙導同注一壑而西北流注于河

又東過陝縣北

橐水出橐山西北流又有干水出南山北谷逕崖峽北流與干山之水會出干山東谷兩川合注于崖水又東北注橐水北流出谷謂之漫澗矣與安陽溪水合水出石嶠南西逕安陽城南漢武帝封上官桀為侯國也

清

按史記索隱曰表在蕩陰志屬汝南地理志汝南郡安陽縣下云侯國是也方輿紀要云彰德府安陽縣本紂之朝歌地七國時為魏寧新中邑秦昭襄王五十年王齧從張唐拔之更名安陽漢省入蕩陰縣昭帝封上官桀為侯邑然則非陝之安陽城也外戚恩澤侯表桀以昭帝始元二年正月壬寅封武帝字亦誤

潘岳

所謂我祖安陽也東合漫澗水北有逆旅亭謂之漫口

客舍也又西逕陝縣故城南又合一水謂之瀆谷水南

出近溪北流注橐其水又西北逕陝城西西北入于河

河北對茅城故茅亭茅戎邑也公羊曰晉敗之大陽者

也津亦取名焉春秋文公三年秦伯伐晉自茅津濟封

嶠尸而還是也東則咸陽澗水注之水出北虞山南至

陝津注河河南即陝城也昔周召分伯以此城為東西

之別東城卽虢邑之上陽也虢仲之所都爲南虢三虢

此其一焉一清按地理志陝縣下云北虢在大陽東虢

陽夾河對岸南虢卽北虢故有上陽下陽之分亦有南

號北號之稱矣陝爲虢都大陽爲虢塞邑穀梁傳及杜

註可證下陽失而虢不守故春秋書曰滅也何焯云按

杜預云陝縣東南有虢城卽是西虢國此南字或是西

字之誤蓋虢仲之封非雍州之虢其說與班志異春秋

分記曰僖五年虢仲虢叔王季之穆此二虢西虢也仲

之封今陝州陝縣又以別于鳳翔之虢故亦謂之南虢

虢叔之封今鳳翔府虢縣以虢在中國之西又謂之西

虢隱元年制巖邑也虢叔死焉東虢也今鄭州滎陽縣

觀此則北虢卽南虢而非西虢分記所言本于孟堅足

證何說之繆分記爲宋程公說撰其疆理書最其大城

精覈予嘗見宋錢于妹壻姚小坡家眞異寶也

中有小城故焦國也武王以封神農之後於此王莽更

名黃眉矣戴延之云城南倚山原北臨黃河縣水百餘

仞臨之者咸悚惕焉西北帶河水湧起方數十丈有物

居水中父老云銅翁仲所沒處又云石虎載經於此沈

沒二物並存水所以湧所未詳也或云翁仲頭髻常出

水之漲減恒與水齊晉軍當至髻不復出今唯見水異

耳嗟嗟有聲聲聞數里按秦始皇二十六年長狄十二

見于臨洮長五丈餘以爲善祥鑄金人十二以象之各

重二十四萬斤坐之宮門之前謂之金狄皆銘其胷云

皇帝二十六年初兼天下以爲郡縣正法律同度量大

人來見臨洮身長五丈足六尺李斯書也故衛恒敘篆

曰秦之李斯號爲工篆諸山碑及銅人銘皆斯書也漢

自阿房徙之未央前俗謂之翁仲矣地皇二年王莽夢
 銅人泣惡之念銅人銘有皇帝初兼天下文使尚方工
 鑄滅所夢銅人膺文後董卓毀其九為錢其在者三魏
 明帝欲徙之洛陽重不可勝至霸水西停之漢晉春秋
 曰或言金狄泣故留之石虎取置鄴宮苻堅又徙之長
 安毀二為錢其一未至而苻堅亂百姓推置陝北河中
 於是金狄滅余以為鴻河巨瀆故應不為細梗躡湍長
 津碩浪無宜以微物屯流一清按史記索隱引謝承後漢書銅人翁仲翁仲其名也
 三輔舊事銅人十二各重二十四萬斤漢代在長樂宮
 門前董卓壞其十為錢餘二猶在石季龍徙之鄴苻堅
 又徙之長安而銷之也則銅人存者只二枚非三枚亦
 非百姓推置河中誠如道元所云足以杜悠悠繆之口也

斯水之所以濤波者蓋史記所云魏文侯二十六年虢
 山崩壅河所致耳獻帝東遷日夕潛渡墜坑爭舟舟指
 可掬亦是處矣

又東過大陽縣南

交澗水出吳山東南流入河河水又東路澗水亦出吳
 山東逕大陽城西西南流注中澗水入于河河水又東
 逕大陽縣故城南竹書紀年曰晉獻公十有九年獻公
 會虞師伐虢滅下陽虢公醜奔衛全氏曰善長書多不引三傳而引竹書如
 晉滅下陽是一事在僖二年滅虢又一事在僖五年明
 見三傳今竹書混而舉之非矣且醜奔京師不奔衛也
 獻公命瑕父呂甥邑于虢都地理志曰北虢也有天子

廟王莽更名勤田應劭地理風俗記城在大河之陽也
 河水又東沙澗水注之水出虞山東南逕傅巖歷傳說
 隱室前俗名之為聖人窟孔安國傳傳說隱於虞虢之
 間即此處也傅巖東北十餘里即巖輪坂也春秋左傳
 所謂入自巖輪者也有東西絕澗左右幽空窮深地壑
 中則築以成道指南北之路謂之為輪橋也傳說備隱
 止息于此高宗求夢得之是矣橋之東北有虞原原上
 道東有虞城堯妻舜以嬪于虞者也全氏曰釐降媯汭在蒲坂道元明載
 二水于前與虞何豫周武王以封太伯弟虞仲於此是
 張冠李帶不亦慎乎王封太伯後於此是為虞公此是孟堅誤記史
 為虞公

記吳世家云太伯卒無子弟仲雍立仲雍卒子季簡立
 季簡卒子叔達立叔達卒子周章立是時周武王克殷
 求太伯仲雍之後得周章周章已君吳因而封之乃封
 周章弟虞仲於周之北故夏墟是為虞仲然則虞仲是
 仲雍之曾孫周章之弟明係二人小司馬以為祖與孫
 同號也古今人表有中雍在上中列太伯之次有虞仲
 在中中云周章弟與史記合今注作太伯晉太康地記
 弟虞仲酈氏亦誤當作太伯弟後虞仲也

所謂北虞也城東有山世謂之五家家冢上有虞公廟
 春秋穀梁傳曰晉獻公將伐虢荀息曰君何不以屈產
 之乘垂棘之璧假道於虞公曰此晉國之寶也曰是取
 中府置外府也公從之及取虢滅虞乃牽馬操璧璧則
 猶故馬齒長矣即宮之奇所謂虞虢其猶輔車相依唇
 亡則齒寒虢亡虞亦亡矣其城北對長坂二十許里謂

之虞坂戴延之曰自上及下七山相重戰國策曰昔騏驥駕鹽車上於虞坂遷延負轅而不能進此蓋其困處

也橋之東北山溪中有小水西南流注沙澗亂流逕大

陽城東河北郡治也

一清按河北郡見魏書地形志是拓跋氏所置隋書五代志河東郡

河北縣下云舊置河北郡開皇初郡廢則又似治河北縣也且魏志大陽縣亦居河北郡之第四其第一縣為北安沙澗水南流注于河河水又東南左合積石土柱

二溪並北發大陽之山南流入于河是山也亦通謂之

為薄山矣故穆天子傳曰天子自鹽已丑南登于薄山

寘軫之隘乃宿于虞是也

又東過砥柱閒

砥柱山名也昔禹治洪水山陵當水者鑿之故破山以

通河河水分流包山而過山見水中若柱然故曰砥柱

也三穿既決水流踈分指狀表目亦謂之三門矣

全氏曰趙

冬曦云砥柱山之六峰皆生河之中流夏后所鑿其最北有兩柱相對距崖而立即所謂三門也都穆云砥柱在陝州東五十里黃河中循河至三門中曰神門南曰鬼門北曰人門水行其間聲激如雷而鬼門尤為險惡舟筏一入鮮有得脫三門之廣約二十丈其東百五十步即砥柱崇約三丈周數丈以三門為砥柱者誤也

山在虢城東北大陽城東也搜神記稱齊景公渡于江

沈之河鼃銜左驂沒之衆皆驚惕古治子於是拔劍從

之邪行五里逆行三里至于砥柱之下乃鼃也左手持

鼃頭右手挾左驂燕躍鵠踴而出仰天大呼水為逆流

三百步觀者皆以爲河伯也亦或作江沅字者也若因地而爲名則宜在蜀及長沙按春秋此二土並景公之所不至古冶子亦無因而騁其勇矣劉向敘晏子春秋稱古冶子曰吾嘗濟于河龍銜左驂以入砥柱之流當是時也從而殺之視之乃龍也不言江沅矣又考史遷記云景公十二年公見晉平公十八年復見晉昭公旌軒所指路直斯津從龍砥柱事或在茲又云觀者以爲河伯賢於江沅之證河伯本非江神又河可知也河之右則嶠水注之水出河南盤嶠山西北流水上有梁俗謂之鴨橋也歷澗東北流與石嶠水合水出石嶠山

有二陵南陵夏后臯之墓也北陵文王所避風雨矣言山徑委深峯阜交蔭故可以避風雨也秦將襲鄭蹇叔致諫而公辭焉蹇叔哭子曰吾見其出不見其入晉人禦師必於嶠矣余收爾骨焉孟明果覆秦師於此嶠水又北左合西水亂流注于河河水又東千嶠之水注焉水南導於千嶠之山其水北流纏絡二道漢建安中曹公西討巴漢惡南路之險故更開北道自後行旅率多從之今山側附路有石銘云晉太康三年宏農太守梁柳修復舊道太嶠以東西嶠以西明非一嶠也西有二石又南五六十步臨溪有恬漠先生翼神碑蓋隱斯山

也其水北流注于河河水翼岸夾山巍峯岐舉羣山疊
 秀重嶺干霄鄭元按地說河水東流貫砥柱觸闕流今
 世所謂砥柱者蓋乃闕流也砥柱當在西河未詳也余
 按鄭元所說非是西河當無山以擬之自砥柱以下五
 戶以上其間一百二十里河水竦石桀出勢連襄陸蓋
 亦禹鑿以通河疑此闕流也其山雖闢尚梗湍流激石
 雲洞濇波怒溢合有一十九灘水流迅急勢同三峽破
 害舟船自古所患漢鴻嘉四年楊焉言從河上下患砥
 柱隘可鑄廣之上乃令焉鑄之裁沒水中不能復去而
 令水益湍怒害甚平日魏景初二年二月帝遣都督沙

邱部監運諫議大夫寇茲

一清按元和郡縣志引此文作寇慈

帥工三千

人歲常脩治以平河咀晉泰始三年五月武帝遣監運

太中大夫趙國

一清按下缺人姓名

都匠中郎將河東樂世帥眾

五千餘人修治河灘事見五戶祠銘雖世代加功水流
 湍濟濤波尙屯及其商舟是次鮮不踟躕難濟故有眾
 峽諸灘之言五戶灘名也有神祠通謂之五戶將軍亦
 不知所以也

又東過平陰縣北清水從西北來注之

清水出清廉山之西嶺世亦謂之清營山其水東南流
 出峽峽左有城蓋古關防也清水歷其南東流逕臯落

城北服虔曰赤翟之都也世謂之倚亳城蓋讀聲近傳因失實也春秋左傳所謂晉侯使太子申生伐東山臯落氏者也與倚亳川水合水出北山礦谷東南流注于清清水又東逕清廉城南又東南流右會南溪溪水出南山而東注清水又東合乾棗澗水水出石人嶺下南流俗謂之扶蘇水又南歷奸苗北馬頭山亦曰白水原西南逕垣縣故城北史記魏武侯二年城安邑至垣卽是縣也其水西南流注清水水色白濁初會清流乃有元素之異也清水又東南逕陽壺城東卽垣縣之壺邱亭晉遷宋五大夫所居也清水又東南流注于河河水

又東與教水合水出垣縣北教山南逕輔山高三十許里上有泉源不測其深山頂周員五六里少草木

一清按太

平寰宇記東輔山在沁水縣西南九十二里其山及西輔山與析城山相連有相輔之勢又澤州沁水縣下云害水出西輔山水經云害水出垣曲縣界今本無害水之目蓋缺失矣 山海經曰孟門東

南有平山水出于其上潛于其下又是王屋之次疑卽平山也其水南流歷鼓鍾上峽懸洪五丈飛流注壑夾岸深高壁立直上輕崖秀舉百有餘丈峯次青松巖懸赭石於中歷落有翠柏生焉丹青綺分望若圖繡矣水廣一十許步南流歷鼓鍾川分爲二澗一澗西北出一百六十許里山岫迴岨纔通馬步今聞喜縣東北谷口

猶有乾河里故溝存焉今無復有水

一清按續志聞喜邑劉昭補注引史

記曰伐韓到乾河郭璞曰縣東有乾河口但有故溝處無復水也而注下文又有冬乾夏流之稱然則未嘗竟

枯絕也亦一水歷冶官西世人謂之鼓鍾城城之左右見澮水注

猶有遺銅及銅錢也城西阜下有泉西流注澗與教

水合伏入石下南至下峽山海經曰鼓鍾之山帝臺之

所以觴百神卽是山也其水重源又發南至西馬頭山

東截坡下又伏流南十餘里復出又謂之伏流水南入

于河山海經曰教山教水出焉西南流注于河是水冬

乾夏流實惟乾河也今世人猶謂之爲乾澗矣河水又

與畛水合水出新安縣青要山今謂之疆山山海經曰

青要之山畛水出焉北流注于河卽是水也河水又東

正回之水入焉水出驪山疆山東阜也東流俗謂之疆

川水與石瓜疇川合水出西北石澗中東南流注于疆

川水疆川水又東逕疆冶鐵官東東北流注于河河水

又東合庸庸之水水出河東垣縣宜蘇山俗謂之長泉

水山海經曰水多黃貝伊洛門也其水北流分爲二水

一水北入河一水又東北流注于河河水又東逕平陰

縣北地理風俗記曰河南平陰縣故晉陰地陰戎之所

居全氏曰按陰戎是陰地之戎杜預曰在河南山北自

善長以爲又曰在平城之南故曰平陰也三老董公說

高祖處陸機所謂皤皤董叟謨我平陰者也魏文帝改
曰河陰矣河水右會灤水水出垣縣王屋西山灤溪夾
山東南流逕故城東卽灤關也漢光武建武二年遣司
空王梁北守灤關天井關擊赤眉別校皆降之獻帝自
陝北渡安邑東出灤關卽是關也灤水西屈逕關城南
歷軹關南逕苗亭西亭故周之苗邑也又東流注于河
經書清水非也是乃灤水耳

水經注釋卷四終

